

8101

829.3

=39



經義考卷二百三十八



秀水 朱彝尊 編

男 昆田 校

爾雅二

邢氏 易 爾雅疏

宋志十卷

存

曷自序曰夫爾雅者先儒授教之術後進索隱之方誠傳注之濫觴為經籍之樞要者也夫混元闢而三才肇位聖人作而六藝斯興本乎發德於衷將以納民於善洎夫醇醜既異步驟不同一物多名繫方俗之語片言殊訓滯今古之情將使後生若為鑽仰由是聖賢閒出話訓遞陳周

公倡之於前子夏和之於後昆蟲草木爰自爾以昭彰禮
樂詩書盡由斯而紛郁然又時經戰國運歷挾書傳授之
徒寢微發揮之道斯寡諸篇所釋世罕得聞惟漢終軍獨
深其道豹鼠既辨斯文遂隆其後相傳乃可詳悉其爲註
者則有犍爲文學劉歆樊光李巡孫炎雖各名家猶未詳
備惟東晉郭景純用心幾二十年註解方畢甚得六經之
旨頗詳百物之形學者祖焉最爲稱首其爲義疏者則俗
閒有孫炎高璉皆淺近俗儒不經師匠今既奉勅校定考
案其事必以經籍爲宗理義所詮則以景純爲主雖復研
精覃思尚慮學淺意疏謹與尚書駕部員外郎直祕閣臣
杜鎬尚書都官員外郎祕閣校理臣舒雅太常博士並集
賢院臣李維諸王府侍講太常博士兼國子監直講臣孫

奭殿中丞臣李慕清大理寺丞國子監直講臣王煥大理
評事國子監直講臣崔偓佺前知洛州永年縣事臣劉士
彜等共相討論爲之疏釋雖上遵睿旨共竭於顛蒙而下
示將來尚慙於疏略謹序

晁公武曰舊有孫炎高璉疏皇朝以其淺略命邢昺杜鎬
等別著此書

陳傅良跋曰古者重小學爾雅所以作也漢興除秦之禁
嘗置博士列於學官至今漢儒書行於世如毛氏詩訓許
氏說文揚氏方言之類蓋皆有所本云隋唐以來以科目
取士此書不課於舉子由是寢廢韓退之以古文名世尚
以注蟲魚爲不切則知誦習者寡矣國初諸儒獨追古依
郭氏注爲之疏爾雅稍稍出比於熙豐三經行學者非字

說不學自先儒注疏皆罷絀而爾雅亦廢予憶爲兒時入鄉校有以爾雅問題者予用能辨鼠豹不識螿蟻爲對其事至淺諸老先生往往驚嘆以爲博也郡有刊疏并音釋若干卷以久不就字畫多殘闕金華趙君子良來爲推官繕補之始頗可讀趙徵余言因叙此書之所以廢且見子良之志子良學於東萊呂伯恭氏於余爲同年進士名善珍

程敏政曰爾雅疏序在舒館直雅集中題曰代邢昺作

王氏雱爾雅

佚

項安世跋曰予讀王元澤爾雅爲之永歎曰嗚呼王氏以父子之學之苦即其比物引類之博分章析句之工其用

力也久其屬辭也精以此名家自足垂世視揚子雲許叔重何至多遜而必欲用此說也咸五帝而登三王縛頡利而臣高昌則已疏矣度不能勝而乃濟之以復輔之以狡招合一時之群小盡逐累世之舊臣以感吾國而覆之以遺凶流毒至使後之擅國者世師焉以享上祇辟之說悅人主以邦朋國是之說空廷臣則王氏父子實爲之津梁可不痛哉

陸氏佃爾雅新義

宋志二十卷

未見

陳振孫曰陸佃撰其於是書用力勤矣自序以爲雖使郭璞擁篲清道跂望塵躅可也以愚觀大率不出王氏之學

與劉貢父所謂不徹薑食三牛三鹿戲笑之語殆無以大
相過也書曰玩物喪志斯其為喪志也弘矣頃在南城傳
寫凡十八卷其曾孫子適刻於嚴州為二十卷

鄭氏樵爾雅注

三卷

存

樵自序曰大道失而後有六經六經失而後有爾雅爾雅
失而後有箋注爾雅與箋注俱奔走六經者也但爾雅逸
箋注勞爾雅者約六經而歸爾雅故逸箋注者散爾雅以
投六經故勞有詩書而後有爾雅爾雅馮詩書以作往往
出自漢代箋注未行之前其孰以為周公哉爾雅釋六經
者也爾雅明百家箋注皆可廢爾雅應釋者也箋注不應

釋者也人所不識者當釋而釋之曰應釋人所不識者當
釋而不釋所釋者不當釋而釋之曰不應釋古人語言於
今有變生今之世何由識古人語此釋詁所由作五方言
語不同生於夷何由識華語此釋言所由作物有可以理
言者以理言之有不可以理言但喻其形容而已形容不
可明故借言之訓以為證此釋訓所由作宗族婚姻稱謂
不同宮室器樂命名亦異此釋親釋宮釋器釋樂所由作
人之所用者人之事耳何由知天之物此釋天所由作牛
於此土識此土而已九州之遠山川邱陵之異何由歷此
釋地釋邱釋山釋水所由作動物植物五方所產各有名
古今所名亦異謂此釋草釋木釋蟲釋魚釋鳥釋獸釋畜
所由作何物為六經集言語稱謂宮室器服禮樂天地山

川草木蟲魚鳥獸而謂經以義理行乎其間而爲緯一經一緯錯綜而成文故曰六經之文爾雅謂言語稱謂宮室器服禮樂天地山川草木蟲魚鳥獸之所命不同人生不應識者也故爲之訓釋義理者人之本有人生應識者也故嬰兒知好瞽者聾者知信義不馮文字而後顯不藉訓釋而後知六經所言早爲長物何況言下復有言哉故爾雅則不釋焉後之箋注家反是於人不應識者則略應識者則詳舍經而從緯背實以應虛致後學昧其所不識而妄其所識也蓋人所不應識者經也實也不得釋則惑得釋則明若曰關關雎鳩在河之洲不得釋則人知雎鳩爲何禽河洲爲何地哉人所應識者緯也虛也釋則不顯不釋則顯董遇有言讀百遍理自見者爲此也若雎鳩河洲

不得旨言雖千誦何益哉何謂釋則不顯且如論語所謂學而時習之不亦說乎無箋注人豈不識孟子所謂亦有仁義而已矣何必曰利無箋注人豈不識中庸所謂天命之謂性率性之謂道無箋注人豈不識此皆義理之言可詳而知無待注釋有注釋則人必生疑疑則曰此語不徒然也乃舍經之言而泥注解之言或者復舍注解之意而泥己之意以爲經意故去經愈遠正猶人夜必寢旦必食不須告人也忽而告人曰吾夜已寢矣旦已食矣聞之者豈信其直如此耳必曰是言不徒發也若夜寢旦食又何須告人先儒箋解虛言致後人疑惑正類此因疑而求因求而迷因迷而妄指南爲北俾日月作月欣欣然以爲自得之學其實沈淪轉徙可哀也哉此患無他生於疑耳其疑

無他生於本來識者而作不識者解耳爾雅訓釋六經極有條理然只是一家之見又多徇於理而不達乎情狀故其所釋六經者六經本意未必皆然樵酷愛其書得法度今之所注只得據爾雅意旨所在因採經以爲證不可叛之也其於物之名大有拘礙處亦略爲之撫正云爾陳振孫曰鄭樵撰其言爾雅出自漢代箋注未行之前蓋憑詩書以作爾雅爾雅明則百家箋注皆可廢爾雅應釋者也箋注不應釋者也言語稱謂宮室器服草木蟲魚鳥獸之所命不同人所不能識者故爲之訓釋義理人之所本有無待注釋有注釋則人必生疑反舍經之言而疑注解之言或者復舍注解之意而泥己之意以爲經意此其爲說雖偏而論注釋之害則名言也

潘氏翼

爾雅釋

佚

王瓚曰翼字雄飛青田人建炎中徙居樂清王十朋之師也

羅氏願

爾雅翼

三十二卷

存

願自序曰惟宋十一世淳熙改元羅子次爾雅翼定著五萬餘言乃論古初造化始端萬彙芒芴並生其間民生如標枝鹿豕爲群自以爲一物不自貴珍有聖人者立傑出其倫使同類相收異類區分正名百物毛羽介鱗園首方趾自別爲民乃佃乃漁乃刊乃焚選百羞百穀以爲常珍

味其辛毒俾相君臣靈智以爲畜猛虺服循異物著之鼎
別姦與神遂超萬物莫與之鄰號名三才與天地均裁制
萬品皆由乎人物患既去其利畢陳智者用其實因既以
文有所著作假之而論故詩首關雎春秋感麟易八卦始
畫仰天俯地窮魚獸之文書契因之是生典墳禮觀象作
服贄死生之物以明卑尊吹竹聽鳳爲樂本原曾論貴多
識譏五穀不分聖有所不語亦有所常言至王會紀遠物
則多異聞離騷志潔惟掇其芳芬不若爾雅博洽雅馴起
於漢世學者自爲專門欲輔成詩道廣撫旁穿萬物異名
始著於篇先師說之義多不鮮由古學廢絕說者無所旁
緣風土不同各據所偏江南之產踰北而遷至其語音亦
不相沿鄭人命死鼠儼於瑛璠六書之相假鱣則爲鱣物

亦固有難識不可汎觀惡莠亂苗豫章須七年非好古博
雅身履藪澤孰能究宣野人能別之不能見於傳至謂鴉
女匠魚罟爲筌六駁以爲馬不可駕牽謂芍藥無香說芳
艸者初不識蕙與蘭羅子疾之乃探其原因爾雅爲資略
其訓詁山川星辰研究動植不爲因循觀實於秋玩華於
春俯矚淵魚仰察鳥雲山林臯壤遇物而欣有不解者謀
及藹薪農圃以爲師釣弋是親用相參伍必得其真此書
之成爲雅羽翰其涵如海其負如山其稱物小義炳而寬
不强所不知義無不安字中所有目擊而存指毛命獸見
未知根可用閱覽虞悅性情玩化無窮以觀我生率是佐
時人主以裁成通之於六籍疑義以明千世之下與雅並
行後有子雲君山之傳乃知其精雅道復顯功斯亦宏矣

王應麟後序曰爾雅翼三十有二卷歛羅公願端良謨惟
大學始教格物致知萬物備於我廣大精微一草木皆有
理可以類推卓爾先覺即物精思體用相涵本末靡遺水
華庭草玩生意以自怡雞雛觀仁乾坤具梅枝鉅而包萬
彙乎觀物纖而析衆芳乎楚辭約不膚陋博不支離蓄德
致用一原同歸彼謏聞者誤荔挺杜若不識蟹螯牙重
常徒語怪而庶鴟售欺矧編絕簡脫之餘烏虎魚豕柳卯
芟茲至於萊綠棖萑蘋薺茨萍菜棗熊能螭鹵鴟鶴
鷖鷓雜糅而紛披諼憲導導蜂嚶鷲訓義之參差芑有
菜草粟之別杞有梓柳櫪之殊名之相混獸則蛭蜩蝦蛤
草則鼈蠹鷓雛女摯之菜與榛異鳴埴之藿與籬異校諸
經而多違小大同稱有鯤有麇新雉之木以為草類苑紀

鸞斯王會芣苢伊尹書盧橘荒異物其誰咨姬隅以音變
烏啄以字迷堯韭舜榮儷句為嬉豆逼莫解苻蓐曰莧葵
問稻何草而謂羊蹲鴟候氣廢葭苧議樂味秬秠或有能
辨蒲盧表枸杞別象膽與駁而問天雞指不勉之善取騶
虞竊脂然洽通之彥猶藹醬失對謬剝棗於豳詩蓋驚遠
略近蠟高忽卑孰知爾雅附於經多識是資諸儒箋釋角
立墨畦歆炎樊李文學健為景純之後顧謝沈施陸音邢
疏分轡並馳鮒演以小累矩疊規揖廣憲博劉續陸埤斟
酌羣言瘳醇孺醜理無窮書有蹟未窺夫浩倉槃物化育
亡厓益不殫名隸首難徧稽山經所有恢詭譎奇地負九
十物草十二衰考工記卻行紆行之屬鴻烈庶烏庶魚之
類萬端千岐物物而察必研其幾匪淹綜沈潛貫璣組絲

蠹克鈎索幼眇甄剖是非淵哉若人如五總龜筆爲鉏耒
迺芸迺菑覽故考新揆叙物宜根極六藝冰渙昔疑囊括
百家抉庾擿珷豈惟傳騷說詩亦解頤纂次有典則班馬
可追爲雅忠臣翼之以飛本立言之志欲率是佐時陶冶
旁薄印贊範圍中和位育與物春熙匪銜豹鼠之辯以貽
蟲魚譏入國問喬木誦其文爲師昔者朱子稱經緯縝密
惜其先萎小集僅傳知此者希歲甲午書成迨庚午九十
七載出若有期自今顯行式永厥垂繇是進大學之道學
者葆之先是公之從曾孫裳錄藏家楹訪求得其書則前
大學博士方君回也識卷後而刊於郡者浚儀王應麟也
方回跋曰宋興二百一十五年淳熙甲午新安竹齋羅公
願字端良次爾雅翼成又九十六年咸淳庚午浚儀王侯

應麟爲守始刊布之回聞之先生君子南渡後文章有先
秦西漢風惟羅鄂州一人甫七歲能爲青草賦以壽其先
尚書少長落筆萬言既冠乃數月不妄下一語其精思如
此以南劔州守陞辭孝廟大賞異俾易鄂州明年淳熙乙
巳卒今新安志行於世與馬班等小集僅文之十一劉公
清之子澄所刊晦翁謂文有經緯嘗欲附名集後又謂羅
端良止此可惜蓋年四十餘使老壽進未艾也爾雅翼者
序見小集世未見其書回訪求得公之從孫裳手抄副本
三十二卷侯躬自校讐雖庾聞隱說具能知所自來可謂
後世子雲矣回竊謂後世學者於天下書鑽研少而剽竊
多靡勞餘力意義曉然古人有終身不能通者或開卷頃
刻而得之道德性命之類有北溪字義而真西山讀書記

為尤精車冕器服之類有三禮圖而陳祥道禮書為尤博
考論經傳草木鳥獸蟲魚則許謹陸璣張揖曹憲邢昺陸
佃不如此翼之為尤悉是書皆前代所無挾是以求為儒
易易矣雖然學陋俗壞承弊踵訛以無言道以氣言性以
知覺言仁以詐謀言智以反經言權以姑息言恕以輪迴
言生死以祠廟言鬼神詖淫邪遁先儒闢之非不至而士
之陷溺者猶不自知也以誤注本草為世之害而不以誤
注易為世之大害識者患焉賢侯父子有德吾州嘗以右
螭直北門是將推所學陶天下俾本末精麤將無不一歸
於是云

洪焱祖跋曰鄉先生羅公端良著爾雅翼三十有二卷釋
草八卷凡一百二十名釋木四卷凡六十名釋鳥五卷凡
五十八名釋獸六卷凡七十四名釋蟲四卷凡四十名釋
魚五卷凡五十五名通為名四百有奇附見者不與夫爾
雅之作多為釋詩毛公傳詩皆據爾雅今觀此翼明詩之
義者一百二十章明三禮之義者一百四十章有奇他如
易象春秋傳閒亦因有發明蓋先生生成此書時年三十有
九經學最精非但為爾雅之翼而已也咸淳庚午郡守厚
齋先生浚儀王公應麟始刊布之今五十年矣板逸不存
郡守自齋先生北譙朱公霽屬學官訪求墨本節費重刊
且以難字頗多初學未能遽曉俾焱祖詳加音釋附於各
卷之末又舊本出於筆吏之手頗有訛舛謹為正之所不
知者闕昔莆田鄭公樵序昆蟲草木略以為學者皆操窮
理盡性之說而以虛無為宗至於名物之實學則置而不

問愚嘗竊疑其言之過及觀所作草類以公之博物洽聞猶不免自以蘭蕙爲一物則知鳥獸草木之學豈易言哉先聖教人學詩多識者此也學者觀於此翼其勿以明道玩物喪志之說藉口而自恕云延祐七年

顧璘跋曰予向嘗讀宋羅鄂州集見朱子敬服其文以爲南渡以來文人之所鮮有近復得鄂州所著爾雅翼於其遠孫惟美則又以見鄂州之學之博而非人之所易窺也爾雅博物之書也天下之物廣矣一物之理未窮則一物之知缺焉學者之意豈不以一物未窮若無害乎其學而不知學之疎淺未必不自茲而始也孔子生知之人也其入太廟必每事問復曰我非生而知之好古敏以求之者也此聖人之所以爲聖也是書之於格物詳矣學者能復

熟研究由是而進大學之道蓋無難者則是書也固將與雅並行有不俟後世之子雲而知之矣正德己卯

都穆序曰爾雅周公書也昔之志藝文者以之附於孝經志經籍者以之附於論語皆所以尊經也唐四庫書目始置之小學之首至宋邢昺等奉勅爲疏爾雅遂復與諸經並列由周而後人之作者漢孔鮒有小爾雅魏張揖有廣雅宋陸農師有埤雅此外又有爾雅翼者其爲卷三十有二總十萬餘言宋知鄂州新安羅公願之所著也書嘗一刻於宋再刻於元以屢經兵燹人閒罕存雖公之後人與鄉之士夫閒有藏者率皆繕寫且多譌缺予家舊藏乃宋刻本後以歸李工部彥夫蓋彥夫新安人也今羅公十六世孫文殊持是書來謁詢之知其捐貲新刻即予向所遺

李君者也遂作而歎曰博哉羅公之學乎世之學者多務
高遠而忽卑近至於訓詁直眇焉視之以爲無用而不足
究心嗚呼其亦弗思而已矣孔子之教學者曰博學於文
孟氏亦曰博學而詳說之而況大學之教先於格物夫一
物不知君子所恥孔子聖人也嘗辨商羊識萍實論者謂
其小吾夫子殊不知人而曰聖以其無所不通使有問焉
懵然無答其與庸人亦奚異哉大抵學以聖人爲師古之
人到於今稱之世之君子或猶有未逮然則物豈可以易
格學豈可以自足也哉是書之出後於陸氏而考覈名物
援引百家所謂其涵如海其負如山者誠非虛語若其博
視陸氏殆又過之學者得此不俟旁求泚閱而坐收格物
之功則公澤之及人固亦多矣惜乎史闕公傳文獻通考
亦不載其書茲非文殊不能使其晦而復傳噫羅氏之子
孫衆矣若文殊者顧不謂之孝邪

洪氏 焱祖 爾雅翼音釋

三十二卷

存

徽州府志洪焱祖字潛夫歙人由平江學錄遷衢州路學
教授改處州遂昌簿以休寧縣尹致事爾雅翼音注三十
二卷列於徽學今廢

陳氏 櫟 爾雅翼節本

佚

櫟自述曰羅鄂州爾雅翼博矣好處可以廣人之識見者

儘多可恨處牽引失其精當者不少內引三百篇之詩處多不是嘗編一節本

胡氏炳文爾雅韻語

未見

危氏素爾雅略義

十九卷

未見

張萱曰元至正初檢討危素節略郭邢二家注疏進御抄

本

薛氏敬之爾雅便音

未見

羅氏日襲爾雅餘

八卷

未見

譚氏吉聰爾雅廣義

五十一卷

存

顧炎武曰舟石勤於讀經叩其書齋插架十三經注疏手

施朱墨始終無一誤句我行天下僅見此人

亡名氏爾雅音訓

通考二卷

佚

崇文總目不著撰人名氏以孫炎郭璞二家音訓為尚狹頗增益之

互注爾雅貫類

宋志一卷

佚

王應麟曰不知作者取字同者類之

爾雅兼義

通志十卷

佚

爾雅發題

通志一卷

佚

經義考卷二百三十八終

後學歙縣吳家龍覆按

爾雅

卷二百三十八

古

經義考卷二百三十九

秀水 朱彝尊 編

男 昆田 校

羣經一

漢石渠五經雜議 唐志題劉向

漢志十八篇 唐志七卷

佚

范甯曰漢興以來瓌望碩儒各信所習是非紛錯準裁靡定故有父子異同之論石渠分爭之說

劉勰曰石渠論藝白虎通講聚述聖言通經論家之正體也

呂祖謙曰宣帝論五經亦長專門之風其用經術差勝武

按徐天麟西漢會要彙載雜議羣儒姓名蕭望之
韋元成施讐梁邱臨歐陽地餘林尊周堪孔霸張
山拊張生薛廣德戴德戴聖聞人通漢劉向凡十
有五人攷假倉以小夏侯學為謁者論石渠而徐
氏失載又大戴未聞其議石渠意誤讀孟卿傳也

劉氏向五經通義

隋志八卷 七錄九卷唐志同

佚

王應麟序曰劉向辨章舊聞則有五經通義通義者漢五
經課試之學也維漢以文立治以經選士鴻生傳業支蕃
葉滋闡繹道真探索聖蘊決科射策則有通義之目以立

子明事則有博文之名趙岐題辭猶述大槩謹稽合史傳
而為之說曰聖人作經載道學者因經明道學博而不詳
說無以發羣獻之眇旨說詳而不反約無以折衆言之殺
亂故必泝正學之源而後能通乎聖人之海粵自木鐸聲
寢經與道榛塞孟子闢邪距詖羽翼孔道七篇垂訓法嚴
義精知性知天易之奧也以意逆志詩之綱也言稱堯舜
書之要也井田爵祿之制可以知禮王霸義利之辨可以
知春秋儒者稱之曰通五經噫若孟氏斯謂之通矣噉哉
漢之尊經乎儒五十三家莫非賢傳也而孟子首置博士
九流百八十九家莫非諸子也而通義得述孟子斯文之
統紀以一多士之趨向以純非徒綴訓故誦佔畢而已若
稽前載建元五年春五經始立博士元朔五襍通一藝者

試之孝元好儒通一經者復之博士十四昉於建武選受
四經俶於建初科有甲乙試有家法或試經於太常或試
誦說於博士永元十四年司空徐防建言開五十難解釋
多者爲上第演文明者爲高說所謂博文明事雖鞅不傳
然建武中太子諸王欲爲通義而聘鄭衆建初四年會諸
儒白虎觀命史臣著通義曹褒傳慶氏禮亦纂通義十二
篇觀其名可求其略矣還觀有漢之盛鉅儒石師開門授
徒著錄至萬六千人經數家家數說章句多者百餘萬言
歷禩綿邈湮沒居多嘗即詩禮訓注考之小弁述親親之
言王制述貢助徹之法爵德齒釋於大宰經界釋於小司
徒圭田市廛關譏釋於載師廛人司關助有公田國中什
一及函矢之說又詳列於考工記珠貫絲組下洽通蓋

傳得其宗無越鄒孟求觀聖道必自茲始否則續以華藻
汨以緯候芟茲詭辨稽古曼辭燕譏郢書吾道莠矣焉得
而通諸雖然經學至於通而止漢儒之說何其紛紛也五
經通義劉向輯之五經通論沛獻著之程曾通難注丹易
通專己黨同轍殊牖異君子已不能無憾況課試之學以
明經爲利祿之塗則通義乃諸儒之筌蹄也其不傳於今
有以夫吁師異道人異論漢儒之說猶得以考同異折是
非也暨唐貞觀十二年會萃章句爲義百七十卷由是
舉天下宗一說而無深造自得之功若明經又變爲帖誦
而口義墨義興焉君子又惜通義之不傳於今也

按五經通義唐志尚存觀王伯厚擬序宋季已無
傳矣今就羣書所引者次於後冬至陽動於下推

陰而上之故大寒於上夏至陰動於下推陽而上
之故大熱於上日在牽牛則寒在東井則暑牽牛
外宿遠人故寒東井內宿近人故溫也冬至所以
寢兵鼓商旅不行君不聽政事何冬至陽氣萌陰
陽交精始成方萬物氣微不可動泄王者承天理
故率天下靜而不擾也易曰先王以至日閉關后
不省方以此助之始夏寢兵鼓不設政事何所以
助陰氣之養也震與霆皆霹靂也月中有兔與蟾
蜍何月陰也蟾蜍陽也而與兔並明陰系乎陽也
神之天者曰昊天上帝其佐曰五帝王者所以祭
天地何王者文事天母事地故以子道事之祭以
以丁與辛何丁者反覆自丁寧辛者當自剋辛也

王者所以因邳祭日月星辰風伯雨師山川何以
爲皆有功於民故祭之也皆天地之明神從官也
緣天地之意亦欲及之故歲一祭焉禮日出於南
門外禮月四瀆於北門外禮山川邱陵於西門外
禮風伯雨師於東門外各即其位也其祭之奈何
曰祭日者縣祭月者■祭風雨者禋祭星者布祭
山川者沈各象其貌也王社藉田中爲千畝報功
也文家右社稷左宗廟質家左社稷右宗廟泰山
一曰岱宗言王者受命易姓報功告成必於岱宗
也東方萬物始交岱宗處之長也言爲羣岳之長
王者諸侯所以三年一禘五年一禘何三年一閏
天道小備故三年一禘禘皆取未遷廟主合食大

祖廟中五歲再閏天道大備故五歲一禘禘者締也取已遷廟主合食太祖廟中王者受命而起所以立靈臺何以爲在於中也國之南附近辟雍依

宮也靈臺制度奈何師說云積土崇增其高九仞上平無屋高九仞者極陽之數上平無屋望氣顯著天子立辟雍者何所以行禮樂宣德化教導天下之人使爲士君子養三老事五更與諸侯行禮之處也義取四方來觀者平均爾諸侯不得觀四方故闕東以南半天子之學故曰頴宮頴之言半也頴宮水雍其半蓋東西門以南通水北無水也三王教化之宮皆名爲學曰學校者校之言教也夏曰校殷曰序周曰庠兼用之鄉爲庠里爲序

家爲塾諸侯會天子則以方明爲主覲禮云明木也其形四方六面上乎下黃東青南赤西白北黑方明者上下四方神明之象也號者所以表功德號令天下也諡者死後之稱累生時之行而諡之善行有善諡惡行有惡諡所以爲勸善戒惡也諡之言列陳列其行身雖死名常存故謂諡也問曰天子有天子大號諸侯寧有國大號乎答曰天子居無上之位下無所屈故立大號以勸勉子孫諸侯有爵祿之賞削絀之義鈇鉞之誅故無所有國之號也顓頊者顓猶專頊猶愉幼少而王以致太平嘗自愉儉謙約自小之意故兩字爲諡帝堯帝舜先號後諡也帝者德盛與天同號諡雖美終不

過天也故如其次道之婦人以隨從爲義夫貴於朝婦貴於室故得蒙夫之謚婦人無爵故無謚崩薨從何王始乎曰從周何以言之曰尚書曰放勳乃殂落舜曰陟方乃死武王以前未稱崩薨也至成王太平乃制崩薨之義尚書曰翌日乙丑成王崩是也凡奔喪近者先聞先還遠者後聞後還諸侯未葬嗣子聞天子崩不奔喪王者制禮緣人心而爲之斷閔孝子之思不忍去棺柩故不使奔也王冕夏曰收以入宗廟長尺六寸廣八寸前起冕長六寸廣八寸員冠前緇布在上五采組十二旒夏殷之冕如周制矣夏冕黑白赤組旒殷冕黑黃青組旒皮弁冠前後玉飾玉有五德溫潤而澤有

似乎知銳而不害有似乎仁抑而不撓有似乎義有瑕乎內必見於外有似乎信垂之如隊有似乎禮樂者所以象德表功因事之宜受命而王者有六樂焉以太一樂天以咸池樂地以肆夏樂人以大夏樂四時以大濩樂五行神明以大武樂六律各象其性而爲之制以樂其先祖黃帝樂所以爲咸池者何咸皆也池施也黃帝時道皆施於民也王者之樂有先後者各尚其德也以文得之先文樂持羽旄而舞以武得之先武樂持朱干玉戚而舞八音者金石絲竹匏土革木也金爲鐘石爲磬絲爲絃竹爲管匏爲笙土爲埴革爲鼓木爲祝敔簫編竹爲之長尺有五寸歌之言謹也以厚志意

故發聲而歌長言鄭國有溱洧之水男女聚會謳歌相感今鄭詩二十一篇說婦人者十九故鄭聲淫也舞四尺之樂明德澤廣被四表也東尺之樂曰侏離南尺之樂曰任西尺之樂曰禁北尺之樂曰昧東尺之樂持矛舞助時生也南尺之樂持羽舞助時養也西尺之樂持鉞舞助時殺也北尺之樂持干舞助時藏也聞宮聲無不溫雅而和之聞徵聲無不善養而好施功成作樂治定制禮所以禁奢侈滌邪志通中和也餘見正義者不具錄

五經要義

唐志題劉向撰

隋志五卷

佚

按藝文類聚引要義文云周禮鐘磬皆編懸之二十八十六而在一簾謂之堵磬一堵謂之肆初學記引要義文云天子藉田千畝以供上帝之粢盛當孟春啓蟄既郊之後身率公卿大夫而親耕焉所以先百姓而致孝敬也立壇於田所祠之其制度如社之壇又云王者受命創始建國立都必居中土所以總天地之和據陰陽之正均統四方旁制萬國者也又云古者著裘於內而以繒衣覆之乃加以朝服會之時袒其朝服見裘裏覆衣謂之裼裼之言露可見之辭所以示美承好而爲飾加以朝服謂之襲袒謂之裼大裘不覆反本取其質也又云諸侯黼裘以誓田雜羔狐爲黼文也又云天

子之笏謂之珽挺然而無屈也鞞者舜所制也太古之時未有布綿人食禽獸肉而衣其皮知蔽前禾知蔽後至舜冕服既備故復制之示不忘古鞞名有三朝廷則謂鞞鞞宗廟謂之鞞鞞鞞者大帶之飾非鞞也天子朱鞞諸侯赤鞞赤盛色也又云將行者有祖道一曰祀行言祭道路之神以祈也又云木主之狀四方穿中央以達四方天子長尺二寸諸侯長尺皆刻諡於其背又云磬立秋之樂也杜氏通典引要義文云冠嘉禮也冠首服也首服既加而後人道備故君子重之以爲禮之始矣太平御覽引要義文云古者后夫人必有女史彤管之法后妃羣妾以禮御於君所女史書其日授其環以進退之有娠則以金環退之當御者以銀環進之著於左手於左者陽也以當就男故著左手右手陰也既御而復故此女史之職也

沛獻王劉

輔五經通論

佚

後漢書沛王輔好經書善說京氏易孝經論語傳及圖讖作五經論時號曰沛王通論

金樓子劉輔性矜嚴有盛名沈深好經書善說京氏易論集經傳及圖讖文作五經通論世號之曰沛王通明帝甚敬重之賞賜恩寵加異

熊方曰沛獻王輔光武子建武十五年四月封右馮翊公十年十月進爲中山王二十年六月徙爲沛王

班氏固等白虎通德論 一作議奏 一作通義

隋志六卷 宋志十卷

存

後漢書楊終傳終言宣帝博徵羣儒論定五經於石渠閣方今天下少事學者得成其業而章句之徒破壞大體宜如石渠故事永為後世則於是詔諸儒於白虎觀論考同異焉會終坐事繫獄博士趙博校書郎班固賈逵等以終深曉春秋學多異聞表請之終又上書自訟即日貫出乃得與於白虎觀焉

儒林傳建初中大會諸儒於白虎觀考詳同異連月乃罷肅宗親臨稱制如石渠故事顧命史臣著為通義

孝明八王傳陳敬王羨博涉經書有威嚴與諸儒講論於

白虎殿

丁鴻傳肅宗詔鴻與廣平王羨及諸儒樓望成封桓郁賈逵等論定五經同異於北宮白虎觀使五官中郎將魏應主承制問難侍中淳于恭奏上帝親稱制臨決

班固傳遷予武司馬天子會諸儒講論五經作白虎通德論令固撰其事

蔡邕曰孝宣會諸儒於石渠章帝集學士於白虎通經釋義其事優大

劉知幾曰漢世諸儒集論經傳定之於白虎閣因名曰白虎通

通鑑曰白虎觀議五經名儒丁鴻樓望成封桓郁班固賈逵及廣平王羨皆與焉

中興書目白虎通十卷凡四十篇今本自爵號至嫁娶凡四十三篇

呂祖謙曰講白虎觀議論發於楊終以人才好惡定諸儒是非亦未爲得

陳振孫曰章帝詔諸儒講論五經同異五官中郎將魏應承制問侍中淳于恭奏帝親稱制臨決作白虎議奏蓋用宣帝石渠故事石渠議奏今不傳矣班固傳稱撰集凡四十四門

曹氏衰五經通義

十二篇

佚

按劉向曹衰俱撰五經通義羣書所引大都皆向之說惟太平御覽一條竊有可疑文云歌者象德舞者象功君子尚德下功故歌在堂舞在庭何言歌在堂也燕禮曰升歌鹿鳴以是知之何言舞在庭也援神契曰合忻之樂舞於堂西夷之樂陳於戶以是明之度劉向時援神契未行於世至衰撰禮多雜以五經讖記之文然則此蓋衰十二篇中語也

許氏慎五經異義

隋志十卷

佚

後漢書許慎字叔重汝南召陵人少博學經籍馬融常推敬之時人爲之語曰五經無雙許叔重爲郡功曹舉孝廉

再遷除汶長初慎以五經傳說臧否不同於是撰爲五經
異義又作說文解字十四篇

新唐志鄭子駁

按許氏異義唐以後無傳僅散見於初學記通典
御覽諸書所引至於鄭康成駁議三禮正義而外
僅存數條一曰妾母之子爲君子得尊其母爲夫
人按春秋公羊說妾子立爲君母得稱夫人故上
堂稱妾屈於嫡下堂稱夫人尊行國家則士庶起
爲人君母亦不得稱夫人父母者子之天也子不
得爵命父母至於妾子爲君爵其母者以妾本接
事尊者有所因也穀梁說魯僖公立妾母成風爲
夫人入宗廟是子而爵母也以妾爲妻非禮也故

春秋左氏說成風得立爲夫人母以子貴謹按尚
書舜爲天子瞽瞍爲士明起於匹庶者子不得爵
父母也至於魯僖公本妾子尊母成風爲小君經
無譏文公羊左氏議是也鄭氏駁曰禮喪服父爲
長子三年以將傳重故也衆子則爲之周明無二
嫡也女君卒貴妾繼室攝其事爾不得復立夫人
魯僖公妾母爲夫人者乃緣莊夫人哀姜有殺子
般閔公之罪應貶故也近漢呂氏殺戚夫人及庶
子趙王不仁庶不得配食文帝更尊其母薄后非
其比耶妾子立者得尊其母禮未之有也一曰奔
大喪左氏說諸侯蕃衛之臣不得棄其封守諸侯
千里之內奔千里之外不奔四方不可室空故遣

大夫也鄭氏駁云禮天子於諸侯無服諸侯爲天子斬縗三年是尊卑異者也春秋文四年夫人成風薨王使榮叔來唁且贈又王使毛伯來會葬傳曰禮也至叔孫得臣如京師葬襄王則使無言焉天子於魯既唁贈又會葬爲得禮是則魯於天子一大夫會葬而已爲不得禮可知矣按昭三十年晉侯去疾卒秋葬晉頃公傳曰鄭游吉弔且送葬魏獻子使士景伯詰之其對辭有靈王之喪我先君簡公在楚我先大夫印段實往敝邑之少卿也王吏不討恤所無也豈非左氏諸侯奔天子之喪及會葬之明文耶孔氏禮疏亦引之其文稍異大鴻臚眭生說諸侯踰年即位乃奔天子喪春秋之

義未踰年若死不成以人君禮言王者未加其禮故諸侯亦不得供其禮於王者相報也許氏又按禮不得以私廢公卑廢尊如禮得奔喪今以私廢奔天子之喪非也又人臣之義不得按計天子未加禮於我亦執之不加禮也眭生之說非也鄭氏按孝經資於事父以事君言能爲人子乃能爲人臣也服問嗣子不爲天子服此則嫌欲速不一於父也喪服四制曰門內之治恩掩義門外之治義斷恩此言在父則爲父在君則爲君也春秋莊三十二年子般卒時父未葬也子者繫於父之稱也言卒不言崩未成君也未成君猶繫於父則當從門內之治恩掩義禮者在於所處此何以私廢公

何以卑廢尊一曰未踰年之君立廟不春秋公羊
說云未踰年君有子則書葬立廟無子則不書葬
恩無所錄也左氏說云臣之奉君悉心盡恩不得
錄君父有子則爲立廟無子則廢也或議曰許君
按禮云臣不殤君子不殤父君無子而不爲立廟
是背義棄禮罪之大者也鄭氏駁云未踰年君者
魯子般子惡是也皆不稱公書卒弗諡不成於君
也廟者當序於昭穆不成於君則何廟之立凡無
廟者爲壇祭之近漢諸幼少之帝尚皆不廟祭而
於陵云一曰諸侯未踰年出朝會與不出會何稱
春秋公羊說云諸侯未踰年不出境在國中稱子
以王事出亦稱子非王事而出會同安父位不稱

子鄭伯伐許未踰以本爵譏不子也左氏說諸侯
未踰年在國內稱子以王事出則稱爵詘於王事
不敢伸其私恩鄭伯伐許是也春秋不得以家事
辭王事諸侯蕃衛之臣雖未踰年以王事稱爵是
也鄭氏駁云昔武王卒父業既除喪出至孟津之
上猶稱太子者是爲孝也今未除喪而出稱爵是
與武王義反矣春秋僖九年春三月丁丑宋公禦
說卒夏公會宰周公齊侯宋子衛侯鄭伯許男曹
伯于葵邱宋子即未踰年君也出與天子大夫會
是非王事而非子耶未踰年之君繫父不公羊說
云未踰年之君皆繫於父晉里克殺其君之子奚
齊於次時父未葬雖未踰年稱子成爲君不繫於

父齊公子商人殺其君舍父已葬按禮制若喪未葬已葬儀各有差嗣君號稱亦宜有差左氏說是也一曰諸侯有妾母喪得出朝會不春秋公羊說妾子為諸侯不敢以妾母之喪廢事天子大國出朝會禮也魯宣公如齊有妾母之喪經書善之左氏說云妾子為君當尊其母有三年之喪而出朝會非禮也故譏魯宣公按禮妾母無服貴妾子不立而他妾子立者也不敢以卑廢尊事者禮也即妾子為君義如左氏鄭氏駁云喪服緦麻庶子為後為其母此義自天子下至庶人同不得三年魯襄公所以得尊其妾母敬羸為夫人者以夫人姜氏大歸齊不反故也因是言妾子立母卒得為之

三年於禮為通乎其服之閒出朝會無王事與鄭伯伐許何異一曰大戴記禮器云竈者老婦之祭許君按月令孟夏之月其祀竈五祀之神王者所祭非老婦也鄭氏駁云王為羣姓立七祀一曰司命主督察三命也二曰中霤主宮室居處也三曰門四曰戶主出入五曰國行主道路六曰大厲主殺也七曰竈主飲食也竈神祝融是老婦攷鄭氏於何休漢議亦有駁而今罕得傳錄此可以類推矣又按異義左氏說山林之地九夫為度九度而當一井藪澤之地九夫為鳩八鳩當一井京陵之地九夫為辨九辨而當一井淳鹵之地九夫為表六表而當一井疆潦之地九夫為數五數而當一

井偃潴之地九夫爲規四規而當一井原防之地
九夫爲町三町而當一井隰臯之地九夫爲牧二
牧而當一井衍沃之地九夫爲井賦法積四十五
除山川坑岸三十六井定出賦者九井則千里之
畿地方百萬井除山川坑岸三十六萬井定出賦
者六十四萬井長穀萬乘其詮井地義亦與後鄭
周官注不同

張氏選五經通義

佚

鄭氏六藝論

隋志一卷

佚

孔穎達曰方叔機注

徐彥曰鄭君先作六藝論然後注書

史承節撰碑畧曰公造太學受業師事京兆第五元始通
京氏易公羊春秋三統歷九章算術又從東郡張恭祖受
周官禮記左氏春秋韓詩古文尚書攝齊問道摳衣請益
去山東而入關右因盧植而見馬融考論圖緯精通禮樂
及黨事起遂杜門不出隱修經業於是鍼左氏之膏肓起
穀梁之廢疾發何休之墨守陳元李育校論古今劉瓌范
升憲章文義何進延於几杖經宿而逃袁隗表爲侍中緣
喪不赴孔融之相北海屣履造門陶謙之牧徐州師友折
節比商山之四皓鄉曰鄭公類東海之于君門稱通德漢
公車徵爲大司農給安車一乘所過長吏迎送公乃以病

自乞還家董卓遷都長安公卿舉公爲趙相道斷不至會
黃巾賊數萬見公皆拜相約不敢入縣境時大將軍袁紹
總兵冀州遣使邀公大會賓客乃延升上座身長八尺飲
酒一斛秀着明目儀容溫偉客多豪俊並有才說見公儒
者未以通人許之競說異端百家互起公依方辨答咸出
問表皆得所未聞莫不歎服門人相與撰公答諸弟子問
五經依論語作鄭志八篇公所注周易尚書毛詩儀禮周
官禮記孝經尚書大傳中候乾象歷又著天文七政論魯
禮禘祫義六藝論毛詩譜駁許慎五經異義答臨孝存周
禮難凡百餘萬言經傳洽熟稱爲純儒齊魯開宗之公後
夢孔子告之曰起起今年歲在辰來年歲在巳既寤知命
當終有頃寢疾享年七十有四自郡守以下嘗受業者纍
經赴會者千餘人乃葬於高密縣城西北一十五里礪阜
山之原嗚呼哀哉承節以萬歲通天元年行至州見高密
父老請爲文因爲之銘

呂祖謙曰康成貫通六經會合衆說於經大有功

按鄭氏六藝論云遂皇之後歷六紀九十一代至
伏羲始作十二言之教孔氏疏引叔機注云六紀
者九頭紀五龍紀攝提紀合洛紀連通紀序命紀
凡六紀也九十一代者九頭一五龍五攝提七十
二合洛三連通六序命四凡九十一代也叔機未
詳何時人

又按西漢學士大都專治一經兼經者自韓嬰申
培后蒼孟卿膠東庸生瑕邱江翁而外蓋寥寥也

至東漢而兼者漸多鄭康成出凡易書詩周官儀禮禮記論語孝經無不爲之注釋而又六藝七政有論毛詩有譜禘祫有議許慎五經異議有駁臨孝存周禮有難何休之墨守膏肓廢疾或發或鍼或起可謂集諸儒之大成而大有功於經學者萬歲通天初州刺史史承節撰銘曰公之挺生大雅之懿囊括墳典精通奧秘六藝殊科五經通義小無不盡大無不備此天下之公言也惟其意主博通故於三統九章大傳中候以及易書禮緯靡不有述然其箋傳經自爲經緯自爲緯初不相雜第如七曜四游之晷度八能九錫之彌文三雍九室之遺制經師所未詳者則取諸緯候以明之蓋緯候亦有醇駁之不同康成所取特其醇者耳災祥神異之說未嘗濫及也或疑五帝之名近於怪然此在漢時著之祀典者君子居是邦不非其大夫矧朝廷之典禮乎乃宋儒極口詆之沿及元明隨聲附和至有以此罪之竟黜其從祀者其亦不仁甚矣不觀九峯蔡氏之書傳乎周天三百六十五度四分度之一此洛書甄曜度尚書考靈曜之文也黑道二去黃道北赤道二去黃道南白道二去黃道西青道二去黃道東此河圖帝覽嬉之文也而蔡氏引之於蔡氏乎何傷不觀新安文公之注楚辭乎崑崙者地之中也地下有八柱互相牽制名山大川孔穴相通此河圖括地象之文也三足

烏者陽精也此春秋元命包之文也而文公引之於文公乎何損乃一偏之論在漢儒則有罪在宋儒則無誅斯後學之心竊有未平矣

鄭記

隋志六卷

佚

隋書鄭氏弟子撰

劉知幾曰鄭之弟子分授門徒各述師言更不問答編錄其語謂之鄭記

鄭氏

小同鄭志

隋志十一卷 唐志九卷

佚

後漢書之所好羣書不得於禮堂寫定傳與其人門人相與撰之答諸弟子問五經依論語作鄭志八篇

隋書鄭志魏侍中鄭小同撰

劉知幾曰鄭弟子追論師注及應答謂之鄭志

按鄭志載於正義及通典者大抵張逸趙商冷剛田瓊吳模問而康成答之又有焦喬王權鮑遺陳鏗崇精弟子互相問答之辭

經義考卷二百三十九終

後學歙縣吳鳳華覆校

禮

經卦

節

經義考卷二百四十一

秀水 朱彝尊 編

男 昆田 校

羣經

何氏 五經大義

五卷

佚

隗氏 諸經解

佚

世語隗禧字子牙京兆人黃初中拜郎中年八十餘以老處家就之學者甚多魚豢嘗從問左傳禧答曰欲知滌微莫若易人倫之紀莫若禮多識山川草木之名莫若詩左

氏直相斫書不足精意也參因從問詩禮說齊韓魯毛四家義不復執文有如諷誦又撰作諸經解數十萬言未及繕寫而得聾後數歲病亡也

王氏肅 聖證論

隋志十二卷 唐志十一卷

佚

魏志散騎常侍王肅著諸經傳解及論定朝儀改易鄭氏舊說 孫叔然授學鄭氏之門人王肅集聖證論以譏短之叔然駁而釋之

譙氏周 五經然否論

佚

蜀志譙周撰定法訓五經論古史考之屬百餘篇辟理明通爲世碩儒有董揚之規

杜佑曰譙周五經然否論曰小紀云庶子不爲長子斬不繼祖與禰也此但別庶子而下言不繼祖者謂庶子身不繼禰故其長子爲不繼祖合而言之也虞喜難之曰禮文三發二言繼祖一言連禰如但繼禰則應三年何緣須祖煩而失要合子於父舍經就迂非事實也然則繼祖者必繼禰繼禰者不必繼祖今連禰於祖以已繼之是繼祖者得三年繼禰者不得也至於連禰於祖以別高祖之祖故因禰以繼祖別嫌也

按譙氏然否論羣書引證絕少僅綴二條於後一

云古文尚書說武王崩成王年十三推武王以庚辰歲崩周公以壬午歲出居東癸未歲反禮公冠

記周公冠成王命史作祝辭告是除喪冠也周公未反成王冠弁開金縢之書時十六矣是成王十五周公冠之而後出也一云漢初或云三老答天子拜遭王莽之亂漢度殘闕漢中興定禮儀羣臣欲令三老答拜城門校尉董鈞駁曰養三老所以教事父之道也若答拜是使天下答子拜也詔從鈞議譙周論之曰禮尸服上服猶以非親之故答子拜士見異國君亦答拜是皆不得視猶子也

傅氏咸七經詩

闕

晉書咸字長虞咸寧初襲父奕爵拜太子洗馬累遷御史

中丞卒贈司隸校尉諡曰貞

孔穎達曰傅咸為七經詩王羲之寫

王應麟曰藝文類聚初學記載傅咸周易毛詩周官左傳

孝經論語詩皆四言而闕其一

徐氏苗五經同異評

七錄一卷

佚

晉書苗字叔胄高密淳于人就博士濟南宋鈞受業遂為儒宗作五經同異評郡察孝廉州辟從事治中別駕舉異行公府五辟博士再徵並不就

束氏哲五經通論

佚

楊氏方五經鈞沈崇文總目方作芳舊唐志鈞沈作鈞深

隋志十卷

佚

晉書楊方字公回高梁太守在郡積年著五經鈎沈

崇文總目晉楊芳撰答難申暢自謂鈎取五經之沈義篇

第七闕今少五篇

中興書目晉高涼太守楊方撰自序云晉太寧元年撰鈎

經傳之沈義著論難以起滯

按鈎沉已亡其見於羣書所引者有云夫鳥遊曠

澤之地而比翮者萬羣虎居繁林之藪而接豪者

千數又云夫霜樹落葉而鴻雁南飛桃林披華而

多鳥深入又云東夷之人以牛骨占事示吉凶

無往不中牛非含智之物有若此之驗又云生而

知之者上也問曰孰生而知之乎答曰聖人一儀

既判懸象列暄八風有序四氣錯御覽日月而達

陰陽之數消搖八節俯仰多黃彌綸天地之體窮

竟有生之機瞻天為師用醒已心故曰生知不亦

審乎

徐氏邈 五經音 分見各經

隋志十卷

佚

晉書徐邈博涉多聞雖不口傳章句然開釋文義標明指

趣撰正五經音訓學者宗之

戴氏達 五經大義

隋志三卷

佚

晉書戴逵字安道譙國人師事范宣徙居會稽之剡縣孝武帝時以散騎常侍國子博士累徵不就郡縣敦迫乃逃於吳王珣請徵為國子祭酒復不至

周氏楊五經咨疑 唐志周楊作楊思

七錄八卷

佚

梁武帝五經講疏

佚

梁書孔子祛傳高祖撰五經講疏及孔子正言專使子祛檢閱羣書以為義證

按六代之主篤好儒術莫如梁武立士林館躬御

國子講肄五經皆有講說何佟之嚴植之賀瑒明山賓等覆述制旨朱异賀琛孔子祛等遞相講述經義多至二百餘卷然自同泰捨身而後所臨幸者同泰重雲愛敬開善善覺等寺所開說者涅槃般若大品淨名三慧諸經竺乾之典日密周孔之言日疎此孟子所云下喬木而入幽谷者也

賀氏瑒五經異同評

七錄一卷

佚

簡氏泉六經通數

隋志十卷

佚

梁書鮑泉字潤岳東海人少事元帝累遷至信州刺史世祖令與王僧辯率舟師東逼邵陵王於郢州郢州平元帝以長子方諸為刺史泉為長史行府州事侯景密遣將宋子仙任約率精騎襲之城陷執方諸及泉送之景所後景攻王僧辯於巴陵敗還乃殺泉於江夏沈其屍於黃鵠磯泉博涉史傳於儀禮尤明撰新儀四十卷

隋志梁舍人

沈氏 文阿 經典大義

隋志十二卷 玉海十八卷

佚

經典彖儒大義序錄

隋志二卷 唐志十卷

佚

王氏 元規 讀經典大義

十四卷

佚

孫氏 暢之 五經雜義

隋志六卷

佚

王氏 煥 五經決錄

五篇

佚

七世孫通曰江州府君之述曰五經決錄五篇其言聖賢製述之意備矣

邯鄲氏綽五經析疑

隋志二十八卷唐志三十卷入法家

佚

按析疑文見於初學記所引者有曰漢志先冬至三日晝冬至後三日晝漏四十五刻夜五十五刻先夏至三日晝夏至後三日晝漏六十五刻夜二十五刻又曰先王之制禮樂以節事修樂以導志故觀其禮樂理亂自知也又曰聞角聲無不惻隱而慈者聞商聲無不斷割而亡事也又曰夫笙者法萬物始生導達陰陽之氣故有長短黃鐘之始象法鳳皇

元氏延明五經宗畧

隋志三十三卷唐志四十卷

佚

房氏景先五經疑問

十卷

佚

冊府元龜魏房景先孝文時為太學博士作五經疑問百餘篇符璽郎王神貴答之名曰辨疑合成十卷
葉廷珪曰房景先作五經疑問百篇其語典詣

山東通志景先字光宙山東武城人累官齊州中正卒贈

洛州刺史諡曰文

王氏神貴五經辨疑

十卷

佚

後魏書房景先作五經疑問百餘篇王神貴益之名爲辨
疑

常氏爽五經畧注

佚

爽自序曰傳稱立天之道曰陰與陽立地之道曰柔與剛
立人之道曰仁與義然則仁義者人之性也經典者身之
文也皆以陶鑄神情啓悟耳目未有不由學而能成其器
不由習而能利其業是故季路勇士也服道以成忠烈之
槩甯越庸夫也講藝以成高尚之節蓋所由者習也所因
者本也本立而道生身文而德備焉昔者先王之訓天下
也莫不導以詩書教以禮樂移其風俗和其人民故恭儉

莊敬而不煩者教深於禮也廣博易良而不奢者教深於
樂也溫柔敦厚而不愚者教深於詩也疏通知遠而不誣
者教深於書也潔靜精微而不賊者教深於易也屬辭比
事而不亂者教深於春秋也夫樂以和神詩以正言禮以
明體書以廣聽春秋以斷事五者蓋五常之道相須而備
而易爲之源故曰易不可見則乾坤或幾乎息矣由是言
之六經者先王之遺烈聖人之盛事也安可不遊心寓目
習性文身哉頃因暇日屬意藝林畧撰所聞討論其本名
曰六經畧注以訓門徒焉

冊府元龜常爽字仕明河內人置學館於溫水之右門徒
七百餘人爽因教授之暇述六經畧注以廣制作甚有條
貫

葉廷珪曰常爽不事王侯獨守閑靜講肄經典二十餘年
時號儒林先生

張氏鳳 五經異同評

十卷

佚

樊氏深 五經大義

隋志十卷

佚

七經義綱

隋志二十九卷

佚

七經論 北史本傳作七經異同

隋志三卷

佚

質疑

隋志五卷

佚

按樊氏義綱見於類書所引者有云孔子曰天子
之德感天地洞八方以化合神者稱皇德合天者
稱帝德合仁義者稱王又云珠母者大珠在中小
珠環之又云車上五兵戈交戟首矛牟夷步卒五
兵戈交戟首矛

辛氏彥之 五經異義

佚

北史辛彥之隴西狄道人隋太常少卿封任城郡公進位
開府歷國子祭酒禮部尚書撰五經異義一部行於世

何氏 安 五經大義

五卷

佚

劉氏 炫 五經正名

隋志十二卷

佚

王氏 失名 五經通

隋志五卷

佚

七名氏五經義

隋志六卷

佚

五經義畧

七錄一卷

佚

五經算術

隋志一卷

佚

五經算術錄遺

隋志一卷

佚

經義考卷二百四十終

後學歙縣程夢星覆校

經義考卷二百四十一

秀水 朱彝尊 編

男 昆田 校

羣經 三

陸氏德明 經典釋文

唐志三十卷 分見諸經序錄一卷

存

德明自序曰夫書音之作作者多矣前儒撰著光乎篇籍其來既久誠無閒然但降聖已還不免偏尚質文詳畧互有不同漢魏迄今遺文可見或專出己意或祖述舊音各師成心製作如面加以楚夏聲異南北語殊是非信其所聞輕重因其所習後學鑽仰罕聞指要夫筌蹄所寄惟在

經義考 卷二百四十一
一
文言差若毫釐謬便千里夫子有言必也正名乎名不正則言不順言不順則事不成故君子名之必可言也言之必可行也斯富哉言乎大矣盛矣無得而稱矣然人稟二儀之淳和含五行之秀氣雖復挺生天縱必資學以知道故唐堯師於許由周文學於號叔上聖且猶有學而況其餘乎至於處鮑居蘭翫所先入染絲斲梓功在初變器成采定難復改移一薰一蕕十年有臭豈可易哉豈可易哉予少愛墳典留意藝文雖志懷物外而情存著述粵以癸卯之歲承乏上庠循省舊音苦其太簡況微言久絕大義愈乖攻乎異端競生穿鑿不在其位不謀其政既職司其憂寧可視成而已遂因暇景救其不逮研精六籍采摭九流搜訪異同按之蒼雅輒撰集五典孝經論語及老莊爾雅等音合為三帙三十卷號曰經典釋文古今並錄括其樞要經注畢詳訓義兼辯質而不野繁而非蕪示傳家之學用貽後嗣令奉以周旋不敢墜失與我同志亦無隱焉但代匠指南取笑於博識既述而不作言其所用亦何傷乎云爾

舊唐書曰太宗閱陸德明經典音義美其弘益學者歎曰德明雖亡此書可傳習賜其家布帛百匹

崇文總目德明為國子博士以先儒作經典音訓不列注傳全錄文頗乖詳畧又南北異區音讀罕同乃集諸家之讀九經論語老莊爾雅者皆著其翻語以增損之

晁說之曰德明因古諸儒音韻之學著為釋文惠乎學者深矣

經義考 卷二百四十一
晁公武曰經典釋文三十卷陸德明撰釋易書詩三禮三傳孝經論語爾雅老莊頗載古文及諸家同異德明蓋博極羣書也

陳振孫曰唐陸德明撰自五經三傳古禮之外及孝經論語爾雅莊老兼解文義廣釋諸家不但音切也或言陸吳人多吳音綜其實未必然按前世藝文志列於經解類中興書日始入之小學非也

顏氏師古匡繆正俗

唐志八卷內說經四卷

存

顏揚庭進表曰臣聞織埃不讓蒿華所以極天涓流必納溟渤所以紀地況乎業隆學海義切為山庶進簞於崇高思委輸於潤澤恭惟皇帝陛下誕膺睿圖光臨大寶隆周比迹遠邁成康炎漢儔功近超文景時和玉燭龍圖薦於長河道包金鏡龜書浮於清洛收羽陵之蠹簡俾備蓬山採汲冢之舊文咸歸延閣一言可善屢動宸衷九術不遺每迴天睠臣亡父先臣師古嘗撰匡繆正俗彙草纔半部帙未終以臣疊犯幽靈奄垂捐棄攀風罔及陟岵增哀臣敬奉遺文謹遵先範分為八卷勒成一部百氏紕繆雖未可窮六典荒訛於斯矯革謹齋詣闕奉表以聞輕觸威嚴伏深震悚永徽二年十二月八日

崇文總目唐祕書監顏師古撰采先儒及當世之言參質譌繆而矯正之未終篇而師古沒其子始上之詔錄藏祕閣

晁公武曰師古以世俗之言多繆訛故質諸經史刊而正之永徽中子揚庭上之

陳振孫曰莆田鄭樵有刊謬正俗跋八卷汪玉山亦言揚庭表以為橐草纔半部帙未終則是書初非定本也今前後乖刺極多玉山集中所辯甚詳

趙氏英五經對訣

唐志四卷

佚

唐書注英龍朔中汲令

劉氏貺六經外傳

唐志三十七卷

佚

舊唐書子予貺博通經史明天文律歷音樂醫算之術終起居郎修國史撰六經外傳三十七卷

裴氏僑卿微言注集

唐志二卷

佚

新唐書注開元中鄭縣尉

顏氏真卿五經要畧

通志二卷

佚

李氏適九經要句

佚

熊氏執易九經化統

佚

李肇曰熊執易類九經之義為化統五百卷四十年乃就未及上獻卒於西川武相元衡欲寫進其妻薛氏慮墜失至今藏於家

凌氏準六經解圍

佚

柳宗元曰富春凌君字宗一為崇文館校書郎累遷翰林學士以連累出和州降連州著六經解圍人文集未就

張氏參五經文字

唐志三卷

存

參自序曰易繫辭曰上古結繩以理後代聖人易之以書契百官以理萬人以察蓋取諸夬夬決也王庭孚號決之大者決以書契也逮周禮保氏掌養國子以道教之六書謂象形指事會意形聲轉注假借六者造字之本也雖蟲篆變體古今異文離此六者則為謬惑矣王者制天下必使車同軌書同文故教人八歲入小學文有疑者則必闕而求之春秋之末保氏教廢無所取正各遂其私故孔子曰吾猶及史之闕文也今亡矣蓋夫子少時人猶有闕疑之問後亡斯道歎其不知而作之也蕭何漢制亦有著法太史試學童諷書九千字乃得為吏以六體試之吏人上書字或不正輒有舉劾皆正史遺文可得焯知者劉子政父子授中祕書自史籀以下凡十家序為小學次於六藝

之末後漢許叔重集籀篆古文諸家之學就隸爲訓注
謂之說文時蔡伯喈亦以滅學之後經義分散儒者師門
各滯所習傳記交亂訛僞相蒙乃請刊定五經備體刻石
立於太學之門外謂之石經學者得以取法焉遭離變難
僅有存者後有呂忱又集說文之所漏畧著字林五篇以
補之今制國子監置書學博士立說文石經字林之學舉
其文義歲登下之亦古之小學也自頃考功禮部課試貢
舉務於取人之急許以所習爲通人苟趨便不求當否字
失六書猶爲小事五經本文蕩而無守矣十年夏六月有
司以職事之病上言其狀詔委國子儒官勘校經本送尚
書省參幸承詔旨得與二三儒者分經鉤考而共決之互
發字義更相難極又以前古字少後代稍益之故經典音

字多有假借陸氏釋文自南徂北徧通衆家之學分析音
訛特爲詳舉固當以此正之卒以所刊書於屋壁雖未如
蔡學之精密石經之堅久慕古之士且知所歸然以經典
之文六十餘萬既字帶惑體音非一讀學者傳授義有所
存離之若有失合之則難並至當之餘但朱發其傷而已
猶慮歲月滋久官曹代易儻復蕪汙失其本真乃命孝廉
生顏傳經收集疑文互體受法師儒以爲定例凡一百六
十部三千二百三十五字分爲三卷說文體包古今先得
六書之要有不備者求之字林其或古體難明衆情驚懣
者則以石經之餘比例爲助石經湮沒所存者寡通以經
典及釋文相承隸省引而伸之不敢專也近代字樣多依
四聲傳寫之後偏傍漸失今則采說文字林諸部以類相

從務於易了不必舊次自非經典文義之所在雖切於時畧不集錄以明爲經不爲字也其字非常體偏有所合者詳其證據各以朱字記之俾夫觀省無至多惑大歷十一年六月七日司業張參序

林罕曰大歷中司業張參作五經文字三卷凡一百六十四部

陳振孫曰唐國子司業張參撰大歷中刻石長安太學崇文總目初參拜詔與儒官校正經典乃取漢蔡邕石經許慎說文呂忱字林陸德明釋文命孝廉生顏傳抄撮疑互取定儒師部爲一百六十非緣經見者皆畧而不集顧炎武曰張參五經文字據說文字林刊正繆失甚有功於學

唐氏 九經字樣

唐志一卷

存

唐會要開成二年八月國子監奏得覆定石經字體官翰林待詔朝議郎權知汙于友上柱國賜緋魚袋唐彛度狀準太和漆年十二月五日勅覆定九經字體今所詳覆多依司業張參五經文字爲準其舊字樣歲月將久點畫參差傳寫相承漸致乖誤今並依字書參詳改正訖諸經之中別有疑闕舊字樣未載者古今體異隸變不同如總據說文即古體驚俗若依近代文字或傳寫乖訛今與校勘官同商較是非取其適中纂錄爲新加九經字樣一卷或經典相承與字義不同者具引文以注解今刊削有成請

附於五經字樣之末用證純誤從之

予度序曰臣聞秦焚詩書塞人視聽漢興典籍以廣聰明
伏以龜鳥之文去聖彌遠點畫訛變遂失本源今陛下運
契黃虞道崇經籍觀人文以成俗念鳥跡之乖方由是遂
徵臣之上請許於國學創立石經仍令小臣覆定字體謬
當刊校誓盡所知大歷中司業張參掇衆字之謬著爲定
體號曰五經文字專典學者實有賴焉臣今參詳頗有條
貫傳寫歲久或失舊規今刪補穴漏一以正之又於五經
文字本部之中採其疑誤舊未載者撰成新加九經字樣
一卷凡七十六部四百廿一文其偏傍上下本部所無者
乃纂爲雜辨部以統之若體畫全虧者則引文以證解於
雅言執禮誠愧大儒而辨體觀文式遵小學其聲韻謹依
開元文字避以反言但紐四聲定其音旨今條目已舉刊
削有成願竭愚衷以資後學

林罕曰開元中唐予度以五經文字有所不載者復作新
加九經字樣一卷凡七十六部

陳振孫曰唐沔王友翰林待詔唐予度撰補張參之所不
載開成中上之二書當在小學類以其專爲經設故附見
於此往宰南城出謁有持故紙鬻於道右得此書乃古京
本五代開運丙午所刻也遂爲家藏書籍之最古者

王應麟曰唐大歷十年司業張參纂成五經文字以類相
從開成中翰林待詔唐予度加九經字樣補所不載晉開
運末祭酒田敏合二者爲一編以考正俗體訛謬後周廣
順三年六月田敏進印板九經五經文字九經字樣各二

部一百三十冊宋朝重和元年十一月言者謂張參唐彛
度所撰五經文字九經字樣辨證書名頗有依據然其法
本取蔡邕石經許氏說文宜重加修定分次部類為新定
五經字樣從之

陶宗儀曰唐彛度不知何許人文宗時待詔翰林作九經
字樣辨證繆誤

張氏鑑五經微旨

唐志十四卷

佚

唐會要建中元年十月濠州刺史張鑑撰五經微旨十四
卷上之

韋氏表微九經師授譜

唐志一卷

佚

唐書韋表微以學者薄師道不如聲樂賤工能尊其師著
九經師授譜詆其違

歐陽氏融經學分毫正字

通考一卷

佚

崇文總目唐太學博士歐陽融撰辨正經典文字使不得
相亂篇帙今闕全篇止春秋中帙餘篇悉亡

韋氏處厚路氏隋六經法言唐會要作五經

唐志二十卷

佚

唐會要長慶二年四月翰林侍講學士韋處厚路隋撰五經法言二十卷上之

舊唐書韋處厚居納誨之地乃詮擇經義雅言以類相從為二十卷謂之六經法言獻之

唐書穆宗立韋處厚為翰林侍講學士以帝沖怠不向學與路隋合詩書易春秋禮孝經論語掇其粹要題為六經法言二十卷上之冀助省覽帝稱善並賜金幣

處厚隋進表曰臣聞三皇講道五帝講德三王講仁五霸講義所講不同同歸於理理道之極備於六經雖質文相變忠敬交用損益因時步驟不一然釋三綱越五常而致雍熙者未之有也自秦火蕩藝孔壁穿蠹曲學異塗專門多惑榮道之軌並馳希聖之堂蓋寡蕪文錯起浮義日生

笱冊混散篇卷繁積勞神於累代弊形於當年其知愈博其得愈少夫然通方之士達識之儒且猶不為也況南面之尊師道之契豈不貪而積而遺其者乎伏惟文武孝德皇帝陛下精義神授博識天資山峻詞峰泉畜學海膺休運則混六合而不讓思屈已則舞兩階而不疑故當希聖踵帝肩王轡霸可以區區近躅擬於聖德哉臣處厚臣隋採合易詩書左氏春秋孝經等因其本篇掇其精粹論紀先師微旨今亦附於篇末總題曰六經法言合二十卷獻上取諸身必本於五事通諸物兼暢於三才始九族以及於百室刑室家以儀於天下聖君良佐之往哲人莊士之前言天人相與之際幽明交感之應窮理盡性之辨藥石攻磨之規堯舜禹湯文武理亂之道盡在君臣父子

夫婦朋友之義必舉其興可以觀其違可以戒此其所存者至如爻象錯綜陰陽難名比興箴誨幽隱難釋誥命訓諭古今不合威儀數制命諸有司褒貶揚摧歸諸史法此其所遺者也商鞅之說秦帝歎帝道之難行太宗之納魏徵流王澤而廣被由是言之道無遠近德無重輕能者挈之如毛羽不能者舉之如嵩岱今逢希代之君當難合之運故不能以百家邪說六國縱橫秦漢刑名魏晉偷薄爲盛時道歷代帝王皆務纂修集魏稱皇覽梁著通畧鄴中則有修文之作江右則有壽光之書但誇耀於見聞非垂謀於理本臣今所貴實異斯作陸賈奏甚卑之論尚稱善於高皇方朔獻雜糅之說猶見知於武帝伏惟陛下機務之暇燕息之餘時加省覽天下幸甚

李氏襲譽

五經妙言

唐志四十卷

佚

崔氏

郾

高氏

重

諸經纂要

新唐書本傳作六經要言志作經傳要畧

唐志十卷

佚

唐會要寶歷元年三月高重崔郾進纂要十卷

舊唐書郾與高重抄撮六經嘉言要道區分事類凡十卷

名曰諸經纂要冀人主易省覽賜錦綵銀器

新唐書敬宗嗣位郾自侍講學士進中書舍人謝曰陛下使臣侍講歷半歲不一問經義臣無功不足以副厚恩帝曰朕少閒當請益郾退與高重類五經要言爲十篇上之

以便觀省

慕容氏宗本五經類語

唐志十卷

佚

新唐書注字泰初幽州人大中時

李氏肇經史釋題

唐志一卷

佚

崇文總目唐李肇撰起九經下至唐代實錄列篇帙之凡

槩釋其題

王應麟曰其序云經以學令為定以藝文志為編史以史通為準各列其題從而釋之

鄭氏澣經史要錄

唐志二十卷

佚

劉氏鎔經典集音

唐志三十卷

佚

新唐書注鎔字正範絳州正平人咸通晉州長史

尹氏思貞諸經義樞

佚

馬氏光極九經釋難

宋志五卷

佚

邱氏 光庭 兼明書

宋志三卷

存

陳振孫曰唐國子太學博士邱光庭撰

僧 十朋 五經指歸

宋志五卷

佚

經義考卷二百四十一終

後學祁門馬口楚費校

經義考卷二百四十二

秀水 朱彝尊 編

男 昆田 校

羣經 四

宋真宗皇帝十一經詩

二十七章

佚

玉海祥符七年六月庚辰上作周易詩三章七月辛亥作尚書詩三章八月庚午作春秋詩三章九月甲申作毛詩詩三章庚戌作周禮詩三章十月甲戌作儀禮詩三章十一月二月庚辰作公羊詩三章八年正月丁未作穀梁詩三章閏六月癸巳作孝經詩三章賜羣臣和

胡氏旦演聖通論 分見各經

宋志六十卷 內目錄一卷

佚

崇文總目皇朝祕書監致仕胡旦撰以易詩書論語先儒傳注得失參糅故作論辨正之易百篇書五十六篇詩七十八篇論語十八篇凡二百五十二天聖中獻之

晁公武曰其所論易十六卷書七卷詩十卷禮記十六卷而春秋論別行天聖中嘗獻於朝博辨精詳學者宗焉

陳振孫曰易十七書七詩十禮記十六春秋十其第一卷為目錄旦太平興國三年進士第一人恃才輕躁累坐擯斥晚尤黷貨持吏短長為時論所薄然其學亦博矣

蔣氏至經解

佚

陳耆卿曰臨海人字造之大中祥符六年詔舉遺逸章守德象以名聞詔索所著經解以進授將仕郎本州助教

黃氏敏求九經餘義

宋志一百卷

佚

會要祥符五年正月以懷安軍鹿鳴山人黃敏求為本軍助教敏求明經術嘗著九經餘義四百九十篇轉運使滕涉以其書上進帝命學士晁迥等看詳迥等言所著撰可采故特有是命

崇文總目皇朝處士黃敏求撰摭諸家之說是非者裁正之

中興書目注疏之外言其餘義凡四百九十有四篇
孔氏維等校勘五經正義

百八十卷

佚

玉海端拱元年三月

孫氏奭經典微言

五十卷

佚

玉海天聖初孫奭撰五經切治道者爲五十篇號經典微言上之

賈氏昌朝羣經音辨

宋志三卷 今本七卷

存

昌朝自序曰臣聞古之人三年而通一藝三十而五經立蓋資性敏悟材智特出者焉臣自蒙恩先朝承乏庠序逮今入侍內閣凡二十年年踰不惑裁能涉獵五經之文於五經之道固未有所立嘗患後世字書磨滅惟唐陸德明經典釋文備載諸家音訓先儒之學傳授異同大抵古字不繁率多假借故一字之文音詁殊別者衆當爲辨晰每講一經隨而錄之因取天禧以來中橐所志編成七卷凡五門號羣經音辨一曰辨字同音異凡經典有一字數用者咸類以篆文釋以經據先儒稱當作當爲者皆謂字誤則所不取其讀曰讀爲讀如之類則是借音固當具載二曰辨字音清濁夫經典音深作深音廣作廣世或謂其儒

者迂疎強爲差別臣今所論則固不然夫輕清爲陽陽主
生物形用未著字音常輕重濁爲陰陰主成物形用既著
字音乃重信稟自然非所強別以昔賢未嘗著論故後學
罔或思之如衣施諸身曰衣冠加諸首曰冠此因形而著
用也物所藏曰藏人所處曰處此因用而著形也並參考
經故爲之訓說三曰辨彼此異音謂一字之中彼此相形
殊聲見義如求於人曰假與人曰假毀佗曰敗自毀曰敗
觸類而求其意趣四曰辨字音疑渾如上下下之類隨
聲分義所傳已久今用集錄五曰辨字訓得失如冰凝同
字汜汜異音學者昧之遂相淆亂既本字法爰及經義從
而敷暢著於篇末此書斷自易書詩禮三經春秋三傳暨
孝經論語爾雅凡字有出諸經箋傳中者先儒之說必經
著義既釋文具載今悉取焉凡字之首音雖顯而經傳不
載者則依釋文爲解凡字之音義章灼者則不復引據音
辨之作欲使學者知訓故之言咸有所自聊資稽古之論
少助同文之化謹上

王觀國後序曰沈隱侯高才博洽名亞董遷始譜四聲用
分清濁以彰天子聖哲及製郊居賦示草王筠筠讀至雌

霓

五的反

連蜷沈撫掌欣拊曰僕嘗恐人呼爲霓次至墜石

礎星冰垂墀而帶坻筠皆擊節曰知音者希真奇殆絕所
以相要正在此數句耳嗚呼郊居賦一篇無甚高論尚病
世俗不能辨其音況羣經乎約欲正音徒留意於詞章含
宮咀商惡覩五經之微奧是宜梁武不甚遵用涕唾視之
又何足怪夫國朝之興首以六經涵養士類逮仁廟當宁

儒風載郁典章燦然文元賈魏公總角邃曉羣經章解句
達累官國子監譽望甚休遷崇政殿說書天章閣侍講慶
·歷嘉祐中大拜居政地海內又寧其在經筵嘗進所著書
曰羣經音辨凡五門七卷爲後學著龜有詔頒行實康定
二年十有一月也公以經術致將相出入文武有謀有庸
被知裕陵始終如一勳上柱國邑萬五千戶其遭遇之厚
極儒者榮下視沈約見薄於蕭梁真局促轅下駒耳故能
推其所學西破趙元昊南走儂智高外絕契丹之謀內弭
甘陵之變羣經之效照若日星自胡蝗翳天神汴失守六
飛巡幸駐蹕三吳戎事方興斯文未喪上留神經術登用
鴻儒親札中庸班賜多士發明奧境表章六經州建學官
教覃溥率紹興己未夏五月臨安府學推明上意鏤公音

辨敷錫方州下逮諸邑寧化號稱多士部屬臨汀新葺
庠衿佩雲集是書初下繕寫相先字差毫釐動致魚魯且
患不能周給諸生固請刻本藏於黌宮以廣其傳嘯工東
陽閱月方就解頤折角馳騁羣經者自是遂得指南矣蓋
五經之行於世猶五星之麗於天五岳之蟠於地五行之
蕃於物五事之秀乎人康濟羣倫昭蘇萬彙其功豈淺淺
哉自有經籍以來未嘗無音沈熊著周易音三卷王儉著
尚書音四卷魯世遠著毛詩音二卷李軌著禮記音二卷
徐文遠著春秋左傳音三卷非無音也無音辨爾是宜句
讀不明師承謬戾禮經以寓爲纂左氏以爲爲遠或於老
氏更載爲哉或於洪範改頗爲陂以至讀景爲影命昭爲
韶文異而音同行翻有四召切有三文同而音異傷及史

傳諸子百家音雜字叢蓋亦不勝其訛矣甚者武夫悍卒
味於一丁老師宿儒惑於三豕取作屋穿錐之誚貽杖杜
伏獵之譏②③殊形乃劣異狀忌水乃改洛爲雒惡走乃
省隨爲隋類用俗文俱緣臆出以下上爲下上以縱橫爲
縱橫謚煬帝以爲毓好奇乃爾易穆公而爲繆振古如茲
音辨之行固非小補漢唐藝文志箋注之書有曰音隱有
曰音畧有曰音義有曰音訓有曰音鈔有曰釋音是其於
音未必能辨有曰辨證有曰辨疑有曰辨嫌有曰辨惑有
曰辨字有曰注辨是其所辨未必皆音獨陽休之著書號
辨嫌音又皆蕪累不經爲魏收所薄惟賈魏公沈研經旨
析類辨音傳注箋題不爲曲釋櫛理疑義啓沃宸衷至先
王治心守身經理天下之微意指物譬事毫析縷解故其

辨明舛誤是正羣書上不欺乎君下不欺乎民愈久愈明
卜載不泯渡江之後峩冠博帶傳習益多汀與虔鄰也民
喜弄兵盜賊蠶起郡城坐甲仰食如蠶方鄰壤用師日疲
饋運治賦餘暇獨與諸生雍容俎豆閒談經究微從事音
辨幾於不達時務也鏤板於學雖秀民肄業瀝懇有陳亦
長此邦者之所願欲也書舊有序姑跋其後云

陳振孫曰丞相真定賈昌朝子明撰康定中侍講天章閣
所上凡五門

章氏 崇業 五經釋題雜問

宋志一卷

佚

楊氏 安國 等五經精義

二百二十卷

佚

玉海皇祐三年十月內申詔楊安國等以五經正義節解為書令先撰序及名丁酉安國等請名曰五經義宗精義樞要詔以五經精義為名十二月己亥御延和殿安國等上五經精義序進讀畢賜茶而退辛丑降付邇英閣四年六月壬寅延和殿侍講學士上五經精義周易節解二十卷十一月甲寅御邇英閣侍讀上尚書解節三十卷五年四月癸卯上禮記節解九十卷十月甲寅上春秋節解八十卷仁宗又命侍讀丁度等修纂五經精義周易節解度等言詩書凶服及春秋賊亂皆舊所不講今去留上旨上曰先上吉凶之制百代所遵不可以俗忌而簡去春秋喪

亂之事皆有善惡監戒人主所宜知也亦當存之

齊氏唐五經要旨

通志五十卷

佚

姓譜唐字祖之山陰人天聖進士南雄州僉判歷職方員外郎

劉氏敬七經小傳

宋志五卷

存

中興書目雜釋詩書春秋周禮儀禮禮記論語七經

晁公武曰皇朝劉敞原甫撰其所謂七經者毛詩尚書公羊周禮儀禮禮記論語也元祐史官謂慶歷前學者尚文

詞多守章句注疏之學至敞始異諸儒之說後王安石修經義蓋本於敞公武觀原甫說伊尹相湯伐桀升自陬之類經義多勦取之史官之言不誣

陳振孫曰前世經學大抵祖述注疏其以己意言經著書行世自敞倡之惟春秋既有成書而詩書三禮論語見之小傳又公羊左氏國語三則附焉故曰七經

吳曾曰慶歷以前學者尚文辭多守章句注疏之學至劉原甫爲七經小傳始異諸儒之說王荆公修經義蓋本於原甫云

胡氏順之經典質疑

六卷

佚

姓譜順之原州臨涇人舉進士爲青州從事遷尚書屯田

員外郎

盧氏士宗五經精義

佚

玉海仁宗實錄盧士宗在經筵撰五經精義上之詔藏史館

楊氏繪羣經索蘊

宋志三十三卷

佚

李氏清臣六經論

一卷

存載皇宋文選

經義考
劉氏彛七經中義

宋志一百七十卷

佚

王應麟曰有易無儀禮

王氏庠經說

一篇

闕

宋史王庠字周彥滎州人嘗以經說寄蘇軾謂二帝三王之臣皆志於道惟其自得之難故守之至堅自孔孟作六經斯道有一定之論士之所養反不逮古乃知後世見六經之易忽之不行也軾復曰經說一篇誠哉是言大觀庚寅行舍法於天下州以庠應詔時嚴元祐黨禁庠自陳蘇

軾蘇轍范純仁為知己呂陶王吉嘗薦舉黃庭堅張舜明王鞏任伯雨為交游不可入舉求仕復舉八行第一朝廷知不可屈賜號處士尋改潼州教授賜出身及章服一日四命俱至竟力辭不受

程子頤河南經說

宋志七卷

存

陳振孫曰繫辭說一書一詩二春秋一論語一改定大學一程氏之學易傳為全書餘經具此

張子載經學理窟

宋志三卷

存

晁公武曰雜記經傳之義辨釋老之失

汪偉序曰橫渠經學理窟或以爲先生所自撰偉按照寧九年秋先生集所立言以爲正蒙其平日所俯而讀仰而思妙契而疾書者宐無遺矣明年遂捐館舍所謂文集語錄諸經說等皆出於門人之所纂集若理窟者亦分類語錄之類耳言有詳略記者非一手也雖然言之精者固不出於正蒙謂是非先生之蘊不可也論學則必期於聖人語治則必期於三代至於進爲之方設施之術具有節級鑿鑿可行非徒託之空言者朱子曰天資高則學明道不然且學二程橫渠良以橫渠用功親切有可循守百世而下誦其言若盲者忽覩日月之光聾者忽聆雷霆之聲偷惰之夫咸有立志其正蒙之階梯與其閒數條與遺書所載不殊可見先生平昔與程氏兄弟議論之同而非勦以入也大理丞莆田黃君伯固志趣高遠守道篤信有先生之勇閒取理窟刻於官寺俾有志之士知所嚮往亦推先生多栽培思以及天下之意云

黃鞏跋曰先生經說之類朱文公編次近思錄取之矣獨理窟世所罕見然晁氏讀書志有經學理窟一卷張某撰黃氏日抄亦謂橫渠好古之切故以詩書次周禮焉但晁云一卷而此則五卷豈本自一卷而爲後人所分未可知也考之近思錄凡取之先生文集語錄諸經說者乃皆出於理窟意理窟亦其門人彙輯文集語錄諸經說之語而命以是名殆非先生所自著也然則晁氏與日抄之所云者其又未必然先生文集及諸經說皆不傳其見於近思

錄者亦無幾猶幸是編之存先生所謂知禮成性變化氣質之道學必如聖人而後已者蓋屢書焉世之欲求先生之學者其可忽諸

王氏安石三經新義

佚分見各經

薛應旂曰王介甫解洛誥有不可曉者則闕之此亦見其不專於自用也劉子澄嘗言王介甫不憑注疏欲修聖人之經不拘格例欲新天下之法可謂知務但其出於己者反不逮舊以至誤國害民又曰介甫三經義皆頒之學官既而誅絕之甚遂泯其傳自今思之或不無一二可取當時不以人廢言可也

宋鑑紹興九年少縣陳淵為右正言入對因論程頤王安石學術同異上曰楊時之學能宗孔孟其三經義辨理甚當淵曰楊時始宗安石後得程顥師之乃悟其非上曰視三經義解具見安石穿鑿矣淵曰穿鑿尚小至於道之大原安石無一不差上曰云何淵曰聖學所傳止有論孟中庸論語主仁中庸主誠孟子主性安石皆暗其原仁道至大論語隨問隨答以愛人語樊遲特其一端而已而安石遂謂以愛為仁其言中庸則謂中庸所以接人高明所以處己孟子七篇專發明性善而安石取揚雄善惡混之說至於無善無惡又溺於佛其失性遠矣

楊氏時三經義辨

宋志十卷

未見

中興書目辨王安石書詩周禮三經義之失

玉海紹興五年六月起居郎朱震言故龍圖閣學士楊時所著三經義辨請令本家抄錄投進

呂本中曰龜山沈浸經書推廣師說窮探力索務極其趣涵蓄廣大而不敢輕自肆也

朱子曰龜山一出追奪荆公王爵罷配享孔子且欲劈毀三經板士子不樂遂相與聚問三經有向不可輒欲毀之當時龜山亦謹避而已

王氏居正三經辨學

三十八卷 分見諸經

佚

呂衽謙狀曰公之學根極六藝深醇闕肆以崇是闢非為已任自其少年已不為王氏說所傾動慨然欲黜其不臧以覺世迷其在兵部以事請對因及王安石新學為士大夫心術之害請以辨學為獻上許之公既上辨學而龜山楊先生三經義辨亦上於祕府於是孔孟之本旨始明天下遂不復宗王氏

宋鑑紹興五年正月兵部侍郎王居正獻辨學四十二篇居正嘗入見請以舊所論著王安石父子平昔之言不合於道者為獻上許之居正乃釐為七卷其一曰蔑視君親虧損忠義凡所褒貶悉害名教其二曰非聖人滅天道詆誣孔孟宗尚佛老其三曰深懲言者恐上有聞其四曰託儒為姦以行私意變亂經旨厚誣天下其五曰隨意互說反覆皆危其六曰排斥先儒經術自任務為新奇不恤義

經義考 卷二百四十二
理其七曰三經字說自相牴牾詔送祕書省又進言曰臣聞陛下深惡安石之學久矣不識聖心灼見弊安在敢請上曰安石之學雜以霸道取商鞅富國強兵今日之禍人徒知蔡京王黼之罪而不知天下之亂生於安石居正對曰禍亂之原誠如聖訓然安石所學得罪於萬世者不止此因為上陳安石訓釋經義無父無君一二事上作色曰是豈不害名教孟子所謂邪說者正謂是矣居正退即序上論繫於辨學書首上之

胡氏

楚

諸經講義

佚

一江西南通志胡楚字德林寧都人政和八年進士婺州教授方臘陷滅罹害

黃氏

彥遠

五經指南

佚

江西通志黃彥遠字思邈金谿人政和二年進士為平江府教授調吉水令

張氏

邦彥

經解

佚

樓鑰曰邦彥政和二年由太學上舍擢進士第官左朝散郎贈朝議大夫有經解雜著數十卷

鄒氏

首

六經解

佚

閩書首字晉信福清人宣和二年鄉薦南渡後被訐賜死

張氏

綱

六經辨疑

宋志五卷

佚

六經確論

宋志十卷

佚

王氏廷珪六經講義

十卷

佚

陳氏光六經講解

佚

閩書字世德永春人與陳知柔為友梁克家受業焉官封
州僉判權知贛州嘗進六經講解

蕭氏楚經辯

二卷

未見

陳第曰凡四十九篇

經義考卷二百四十二終

後學歙縣方士庶覆按

秀水 朱彝尊 編

男 昆田 校

羣經 五

程氏 俱 漢儒授經圖

佚

俱自序曰古者尊師而重道自天子達於庶人故孔安國授經昭后死為之服桓榮傳明帝於東宮及即尊位幸其第至里門下車擁經而前蓋其嚴如此漢興諸儒以經誼專門教授故學者必有師承源流派別皆可推考歷東漢二晉以迄有唐餘風猶有存者然其閒大儒閒出不專以一經章句授諸生如王通行道於河汾之閒韓愈抗顏於

元和之際故從之學者其於行已成務作爲文章皆足以名世而垂後如魏證王珪李翱皇甫湜之徒是也陋哉夏侯勝之言也曰士病經術不明經術苟明取青紫如俯拾地芥耳夫所貴於學者豈專爲是哉而勝以利誘諸生何也西漢之俗固已尚通達而急進取矣又使士專爲利而學學而仕仕而顯則不過容悅患失而已如張禹以經爲帝師位丞相而被佞臣之目後世議者謂西漢之亡以張禹谷永因災異之對枉公議以阿王氏二人者皆成帝所取決關漢存亡之機者也然則懷姦徇利豈其志本在青紫故耶後世君子志於青紫者衆求師務學者寡學者亦無所師承此予所以常恨生之晚也方祖宗隆盛之時如孫明復胡翼之以經術楊文公歐陽文忠以學問文章爲

一時宗師學者有所折衷而問業焉王荆公出以經義授東南學者及得君行政於天下靡然宗之元祐閒蘇子瞻以文章主英俊之盟亦云盛矣予卧病里中讀西漢儒林傳觀其師弟子授受之嚴所謂源流派別皆可推考者竊有感焉且浮屠氏自釋迦文佛傳心法與夫講解之宗至於今將二千年而源派譜牒如數一一下至醫巫祝卜百工之技莫不有所師如吾儒師承之道乃今蔑焉所謂學官師弟子如適相遇於塗耳蓋可歎也則其事業之不競語言之不工名節之不立無足怪者因以漢儒授經爲圖以想見漢興之風範云建炎四年六月

羅氏無競
經解

佚

胡銓作傳曰羅無競字謙中廬陵人仕爲建寧主簿卒門
下客私謚曰孝逸先生有經解數卷

吳氏 沆 羣經正論

四卷

佚

玉海紹興十六年九月吳沆進羣經正論四卷

鄭氏 伯熊 六經口義拾遺

佚

宋氏 藻 羣經滯穗

百篇

佚

一閱書藻字去華莆田人紹興中進士知江陰軍

黃氏 開 六經指南

佚

任氏 文薦 六經章句

佚

姓譜閩縣人紹興中進士歷浙江提刑本路都轉運使

楊氏 汝南 經說

二卷

未見 一齋書目有

陸元輔曰汝南字彥侯龍谿人紹興中進士爲廣州教授

撰詩禮中庸春秋義成三十篇以授學者仍表進於朝

洪氏 适 經子法語

未見

楊氏甲 六經圖

六卷

存

中興書目紹興中布衣楊甲撰

毛氏邦翰增補六經圖

六卷

存

中興書目紹興中布衣楊甲撰六經圖乾道中毛邦翰復增補之易七十書五十有五詩四十有十周禮六十有五禮記四十有三春秋二十有九合爲圖三百有九

苗昌言序曰陳大夫爲撫之期年樂民之安於其政思所以富之教之之叙既已創闢試院以奉聖天子三年取士

之制又取六經圖命泮宮執講肄者編類爲書刊之於學以教諸生謂昌言筆教於是邦積十餘年而庠序友生相與愛敬之不衰俾參訂焉既逾月諸經諭各以其圖就議於予且曰六藝之文浩博若欲別加編摩非積以歲月有不能是圖集諸家所長願因其舊庶得以亟稱賢大夫善教之意予躋其說無敢去取惟傳寫詮次有舛誤者是正之而已凡得易七十書五十有五詩四十有七周禮六十有五禮記四十有三春秋二十有九合爲圖三百有九蓋嘗論之自漢儒章句傳注之學行而士之道學益不明逮本朝以經術取士大儒繼出講解一新而後天下之二皆知淵源之歸今是圖之作凡六籍之制度名數粲然可一二數使學者因是求其全書而讀之則造微詣遠茲實其

經義考 卷二百四十三
指南也若因以得於觀瞻之間遂以爲聖人之經盡在於是則破碎分裂不尤甚於爲之華藻擊悅者邪其不見斥於覃思幽眇者寡矣然則陳大夫之易圖爲書不無意也觀者宜深思之

顧起元曰六經圖爲宋紹興中布衣楊甲所撰乾道初知撫州陳森屬教授毛邦翰等補而刻之爲圖三百有九舊鮮行世者頃新都吳氏購得宋本始授梓人計部大夫汝南方公覽而善之謀於同僚諸大夫斥帑羨復刻而存於署既成屬爲之叙夫圖書之用創於聖人使百代憲章譬諸經緯勿可偏廢者也古之學者得其書必攷其圖後之學者修雕繪之技或以詞藻相矜嚴於古之名物度數牴牾濶疏者有矣不知形而上者謂之道形而下者謂之器

天下之道貞夫一者也使盡廢其形則器亡而道亦不可見矣故曰書不盡言言不盡意聖人立象以盡意然則標於指外通於意表惟圖能之是固書之所不盡也窮經者試以是參伍而想像之於六藝之言當更有洞若觀火者又安得謂觀象非忘言之妙哉予又嘗考之易有唐沈熊之譜宋劉牧朱震之圖書有唐之無逸圖治要圖詩有魏衛協之圖唐之草木蟲魚圖春秋有漢嚴彭祖唐張傑李瑾之圖宋鄧名世之譜禮有漢鄭玄阮諶唐張鎰夏侯伏明宋梁正聶崇義之圖陸佃之象今皆軼不存而是編所圖多沿舊記黨枯護朽閒亦有之夫謬解犧尊臆注葵首昔之通人不無可議今以此倚據異同糾廸淆舛因形契理親見古人則是圖誠爲六藝之津涉也方今古學載興

經義考 卷二百四十三
異書間出羽陵蠹簡半在人閒顧經笥斷殘尚須揚摧方
公與諸大夫亟舉是編而表章之其於通經學古裨益弘
多矣

陸元輔曰六經圖宋紹興中布衣楊甲撰乾道初撫州教
授毛邦翰等補大易象數鉤深圖七十首易有太極圖二
次乾知大始次坤作成物次天尊地卑次參天兩地圖次
日月爲易次河圖數圖次洛書數圖次天地之數次乾坤
之策次六子圖次六位圖次伏羲先天圖次方圓相生圖
次仰觀天文圖次俯察地理圖次伏羲八卦圖次文王八
卦圖次八卦取象圖次八卦象數圖次四卦合律圖次八
卦納甲圖次剛柔相摩圖次八卦相盪圖次六爻三極次
五位相合次帝出震圖次著卦之德次序上下經圖次三

變大成圖次重易六爻圖次六十四卦天地數圖次六十
四卦萬萬數圖次卦爻律呂圖次運會歷數圖次乾坤大
父母圖次復姤小父母圖次八卦生六十四卦圖次八卦
變六十四卦圖次陽卦順生次陰卦逆生次復姤臨遯泰
否六卦生六十四卦圖次六十四卦反時變圖次六十四
卦卦氣圖次十三卦取象圖次三陳九卦圖次參伍以變
圖次十有八變圖次一陰一陽圖次先甲後甲圖次陰陽
君民次陰陽奇耦次二儀得十變化次十日五行相生次
大衍之數圖次揲著之法圖次河圖百六數次八卦司化
圖次類聚羣分圖次通乎晝夜圖次陽中陰次陰中陽次
序卦圖次雜卦圖次太彖準易卦名圖次太彖準易卦氣
圖次皇極經世全數圖次邵氏皇極經世圖次溫公著虛

擬彖圖次古今易學傳授圖尚書軌範撮要圖五十有五
首五十八篇數圖次逸書篇圖次作書時世圖次帝王世
次圖次夏世次圖次秦世次圖次晉魯世次圖次堯典四
仲中星圖次日月會次舍圖次四仲日永短圖次四時測
中星圖次日月行冬夏圖次堯九族圖次舜巡四岳圖次
七政五辰圖次璣衡圖次諸侯玉帛圖次律度量衡圖次
十二章服圖次五聲八音圖次六律六呂圖次九韶樂器
圖次五刑四罪圖次舜舞干羽圖次禹貢隨山濬川圖次
禹貢九州疆界圖次禹貢治水先後圖次禹貢九州譜圖
次禹貢九山名數圖次禹貢九川名數圖次濬畝澮距川
圖次堯制五服圖次弼成五服圖次舜十二州圖次商七
廟圖次商五遷都圖次周營洛邑圖次召誥土中圖次九

疇本

疇圖圖次九疇虛五用十圖次洪範九疇圖次九疇合

八疇數圖次九疇相乘得數圖次劉蘇洪範傳圖二次皇

極居次五圖次皇極不言數圖次周宗彝圖次六年五服

朝圖次君牙太常圖次平王錫圭瓚圖次牧誓兵器圖次

費誓兵器圖次漢儒授受書學圖毛詩正變指南圖四十

有七篇首詩篇名次作詩世次次周公世次次召公世次

次衛世次次齊世次次曹世次次陳世次次晉世次次秦

世次次宋世次次族譜次十五國風譜次十五國地理圖

次日居月諸圖次公劉相陰陽圖次楚邱揆日景圖次齊

國風挈壺氏圖次大田雨我公田圖次甫田歲取十千圖

次百夫之田次萬夫之田次載芟藉田圖次時邁巡守圖

次我將明堂圖次清廟閟宮圖次辟雍泮宮圖次斯干考

室圖次秦國風小戎圖次商頌王畿圖次釋草名次釋木
名次釋菜名次釋穀名次釋鳥名次釋獸名次釋蟲名次
釋魚名次釋馬名次釋衣服制名次釋車馬器名次釋禮
樂器名次兵農器名次四詩傳授圖周禮文物大全圖六
十有五首天官冢宰次地官司徒次春官宗伯次秋官司
寇次冬官考工記次王宮制圖次營國制圖次經九軌圖
次朝位寢廟社稷圖次宗廟圖次社稷圖次治朝圖次燕
朝圖次外朝圖次夏世室次商重屋次周明堂次宮寢制
圖次宸制圖次几筵制圖次王畿千里圖次王畿鄉遂采
地圖次井田之法圖次四井爲邑圖次四邑爲邱圖次四
邱爲甸圖次四甸爲縣圖次四縣爲都圖次四都爲同圖
次六鄉圖次六遂圖次五等采地圖次六鄉鄉地圖次職

方九服圖次職方九州圖次行人六服朝貢圖次王公侯
卿士冕服圖次后服制圖次圭璧璋瓚纁藉制圖次圓邱
樂圖次方邱樂圖次宗廟樂圖次分舞樂圖次筍簋鐘磬
制圖次鳧氏爲鐘次木鐸金鐸次鼓人四金圖次舞師樂
師舞制圖次鼓制圖次樂器制圖次祭器制圖次六尊制
圖次六彝制圖次掌客器圖次鬯人制圖次金車玉輅制
圖次墨車制度圖次厭翟車制圖次輪人爲蓋圖次九旗
制圖次射侯制圖次馮相太歲圖次龜人圖次筮人圖次
土圭測日圖次水地法圖次傳授圖禮記制度示掌圖四
十有三首四十九篇數次二十四氣圖次七十二候圖次
月令中星圖次月令明堂圖次十二律還相爲宮圖次月
令十二律管候氣圖次月令所屬圖次月令仲春昏星圖

次月令仲夏昏星圖次月令仲秋昏星圖次月令仲冬昏
星圖次五社制度圖次五帝坐位圖次王制商建國圖次
王制周建國圖次王制公卿大夫士圖次天子縣內圖次
周公明堂圖次武舞表位圖次冠冕制圖次器用制圖次
七廟制圖次祫廟制圖次五廟三廟圖次別子祖宗圖次
郊禘宗祖圖次堂上昭穆圖次室中昭穆圖次燕禮圖次
投壺禮圖次鄉飲禮圖次養老禮圖次冠禮器圖次昏禮
器圖次習射禮圖次饗禮圖次內外用事之日圖次祭祀
用樽之數圖次禮記名數圖次禮記傳授圖春秋筆削發
微圖二十有九首春秋十二公次二十一國世次圖次春
秋一百二十四國爵姓次五霸次齊盟次與盟之國次春
秋諸國地理圖次地名所屬次諸國地理次周地次魯地

次陳地次齊地次晉地次宋地次衛地次鄭地次楚地次
邾地次莒地次紀地次諸國地次闕地次周王族諸氏次
魯公族諸氏次晉公族諸氏次齊公族諸氏次宋公族諸
氏次衛公族諸氏次鄭公族諸氏次陳公族次蔡公族次
吳公族次莒公族次曹公族次虞公族次虢公族次諸侯
興廢次春秋始終次春秋總例數次春秋三傳傳授圖共
三百有九圖

葉氏仲堪 六經圖

宋志七卷

未見

陳振孫曰東嘉葉仲堪思文重編按館閣書目有六卷昌
州布衣楊甲鼎卿所撰撫州教授毛邦翰增補之易七十

今百三十書五十五今六十三詩四十七今同周禮六十
五今六十一禮記四十三今六十二春秋二十九今七十
二然則仲堪蓋又以舊本增損改定者耶

楊氏萬里六經論

一卷

存 載誠齋集

呂氏

祖謙麗澤論說集錄

通考十卷

存

陳振孫曰呂祖謙門人所錄平日說經之語末三卷則此
說雜說東萊於諸經有讀詩記及書說成書而未終也

唐氏仲友說齋六經解

一百五十卷

未見 一齋書目有

九經發題

一卷

佚

先民錄唐仲友字與政金華人號說齋登紹興辛未進士
復中宏詞科判建康府轉知台州抑姦拊弱發粟賑饑創
中津浮橋以濟涉政聲卓然俄為同官高文虎所忌譖諸
倉使屢疏劾之會仲友遷提點江西刑獄而劾者益力遂
主管冲祐觀以歸開席授徒學者數百人益肆力於經史
百家以究其業著帝王經世圖譜十卷六經解諸史精義
羣書新錄各若干卷文集四十卷

周必大曰與政於書無不觀於理無不究凡天文地理禮樂刑政陰陽度數兵農王霸皆本之經典兼采傳注類聚羣分旁通午貫使事時相參形聲相配或推消長之象或列休咎之徵而於郊廟學校畿疆井野尤致詳焉昔漢儒專通一經局守師說居家用以修身蒞官取以決事況乎六經旨趣百世軌範廣記備言精思博考使見諸行事豈不要而有功也與

蘇伯衡曰乾道淳熙間紫陽朱子廣漢張子東萊呂子鼎立於一時而東南學者翕然宗之說齋唐公出乎其時又與呂子同居於婺而獨尚經制之學真可謂特起者矣而豈立異哉公不惟精史學尤邃於諸經自謂不專主一說不務爲苟同隱之於心稽諸聖人合者取之疑者闕之所

著六經解百五十卷九經發題經史難答孝經解愚書各一卷諸史精義百卷帝王經世圖譜十卷乾道祕府羣書新錄八十三卷天文地理詳辨各三卷故事備要詞科雜錄各四卷陸宣公奏議詳解十卷說齋文集四十卷今去公垂二百年傳者蓋無幾矣揚雄有言存則人亡則書欲求公於公之書而其書又如此不愈大可惜哉

王氏 炎 諸經考疑

佚

李氏

舜臣

羣經義

宋志七卷 本傳八卷

佚

徐氏 存 六經講義

俞氏良能 諸經講義

佚

浙江通志 喻良能 義烏人 官至太常寺丞

劉氏光祖 山堂疑問

通考一卷

佚

陳振孫曰 起居郎簡池 劉光祖 德修撰 凡一卷 慶元中 謫居房陵 與其子講說諸經 因筆記之 以其所問於詩為多 遂取呂氏讀詩記 盡觀之 而釋以己意 附疑問之後

俞氏亨宗 羣經感發

十卷

佚

紹興府志 俞亨宗 字兼善 山陰人 隆興二年進士 嘉定中 為祕書少監

游氏桂 畏齋經學

宋志十二卷

佚

陳振孫曰 宣教郎廣安游桂 元發撰 桂隆興癸未進士 歷官至制司機宜

彭氏龜年 訓蒙經解

佚

樓鑰撰碑曰 嘉定改元 詔贈故吏部侍郎彭龜年 為寶謨閣直學士 既又加贈龍圖閣學士 賜諡忠肅 公登乾道五

年進士第嘗著訓蒙經解若干卷藏於家

張氏布六經講解

佚

陳者卿曰臨海人字伯真乾道八年進士歷太學錄博士
樞密院編修官宗正丞權金部右侍郎遷祕書丞知徽州
不赴奉祠終朝散大夫有六經講解藏於家

毛氏璞六經解

佚

葉氏適習學記言序目

五十卷

存

孫之宏序曰習學記言序目者龍泉葉先生所述也初先生輯錄經史百氏條目名習學記言未有論述自金陵歸研玩羣書更十六寒暑乃成序目五十卷子宋既以先志編次論今越帥新安江公鉸木郡齋又囑之宏揭其大指於書首竊聞學必待習而成因所習而記焉稽合乎孔氏之本統者也夫去聖繇邈百家競起學失其統久矣漢唐諸儒皆推宗孟軻氏謂其能嗣孔子至本朝閩洛驟興始稱子思得之曾子孟軻本之子思是爲孔門之要傳近世張呂朱二三鉅公益加探討名人秀士鮮不從風而靡先生後出異識超曠不假梯級謂洙泗所講前世帝王之典籍賴以存開物成務之倫紀賴以著易象象仲尼親筆也十翼則訛矣詩書義理所聚也中庸大學則後矣曾子不在四科之目曰參也魯以孟軻能嗣孔子未爲過也捨孔

子而宗孟軻則於本統離矣故根柢六經折衷諸子剖析秦漢迄於五季以呂氏文鑑終焉其致道成德之要如渴飲飢食之切於日用也指治摘亂之幾如刺臚中盲之速於起疾也推迹世道之升降品目人材之短長皆若繩準而銖稱之前聖之緒業可續後儒之浮論盡廢其切理會心冰消日朗無異親造孔室之闕深繼有宗廟百官之美富可謂稽合乎孔子之本統者也

黃百家曰習學記言存於今者序目而已內說經共十四一卷易四卷書一卷詩一卷周禮儀禮合一卷禮記一卷春秋一卷左氏傳二卷國語一卷論語一卷孟子一卷若記言原本不知若干卷惜乎不得見矣是書前有小陰孫之宏序葉氏門人

任氏希夷經解

十卷

佚

邵武府志任希夷字伯起邵武人淳熙三年進士官至端明殿學士僉書樞密院事兼權參知政事贈少師謚宣獻

傅氏芷羣經講義

佚

應廷育曰芷字升可義烏人淳熙五年進士仙居尉

戴氏厚經解

三十卷

佚

樓鑰志墓曰東嘉戴君浚仲嘗薦於鄉五上禮部至淳熙

八年始以特奏名試補賀州之學尋授迪功郎金華縣尉
改修職郎監漳州南岳廟著經解三十卷藏於家君諱厚
又字長文

李氏燾五經傳授圖

宋志一卷

佚

危氏稹諸經講義集解

佚

江西通志危稹字逢吉臨川人淳熙十四年乙科除南康
軍教授歷屯田司郎官出潮州又知漳州

徐氏大受經解

佚

陳耆卿曰天台人字季可淳熙十一年特科監行在草料
場號竹谿先生有經解藏於家

項氏安世家說

宋志十卷附錄四卷

未見

陳振孫曰九經皆有論注其第八卷以後雜說文史正學
附錄孝經中庸詩篇

華氏鏜六經解

佚

按華氏書無傳楊誠齋荆溪集有贈詩云華鏜晨
趨孔子堂今日覃思彫肺腸毛穎爲君禿盡髮問
君何時放渠歇題曰華鏜秀才著六經解以長句

書其後則其書業成編矣

經義考卷二百四十三終

後學祁門馬曰璐覆校

